

四庫全書

史部

欽定四庫全書

史部

雲南通志卷二十三
四

詳校官給事中臣李臺

刑部郎中臣許北椿覆勘

總校官知縣臣楊懋珩

校對官編修臣盧遂

謄錄監生臣黃臣鵠

欽定四庫全書

雲南通志卷二十三

流寓

滇雲萬里難逾蜀道躡履而至者鮮矣然自漢唐
以來賢士大夫或宦遊而買支遁之山或避地而
築少陵之室清風高躅有足挹者若夫晦迹從亡
批鱗遣戍精誠所貫薄日月而感風雷稽彼芳踪
頑廉懦立不且與蒼山滇海竝垂不朽乎其他騷

人羈客如雍陶賈島輩大雅不羣遠投蠻徼亦空
谷足音也志流寓

雲南府

漢

蘇文達

籍貫未詳東漢建武丙辰從伏波南征交趾
事平瘴疾發不能歸及愈遂為散人遨遊山

水明帝永平戊午來滇至新羅邑即今安寧與郡
主阿樹羅為友歿樹羅立廟祀之相傳安寧溫泉
乃其所
開云

唐

賈餘綯

蜀人善屬文尤長於書寓雲南西巖王碑其手書也

閻邱均

成都人與陳子昂杜審言齊名武后時官博士尋罷後從唐九徵為管記南中碑碣多出

其手西巖王碑暨河東州刺史王仁求碑其撰文也有臨水亭詩載藝文志

賈島

字閬仙范陽人能詩寓雲南有送雍陶入蜀詩載藝文志

雍陶

成都人寓昆明有送裴璋還蜀詩載藝文志

明

劉謹

山陰人洪武中父戍雲南兄又以督運死京師謹六歲問家人曰雲南在何方家人以西南指

之軌朝夕向西南遙拜年十四瞿然曰雲南雖萬里天下豈有無父之子哉治裝尋父歷六月抵雲

南艱辛萬狀遇父於逆旅相持號慟俄而父患瘋痺欲以身代戍而國法戍邊者惟十六以上嫡長男始得更替於是復歸攜伯兄子往而兄子亦尚屏不得代又復歸悉鬻家貲以往蓋三往返雲南始得歸其父焉

王紳

字仲縉義烏人贈學士紳之子也宋濂一見奇之曰華川有子矣蜀王聘之教授蜀郡紳痛父

奉使死難遺骸未返邱隴白王走雲南慟哭行求奠酒於死所仰天一號幾絕滇人感愴稱王孝子建文即位召為國子博士修太祖實錄因上言父死節狀贈祿官賜諡文節後改諡忠文明文臣有諡自禕始

唐循仲

浙江淳安人長於詩洪武中父宗喜戍滇未行卒兄凱仲例當代戍循仲憫兄無倚願與

偕行居數載兄以疾終循
仲竟哀痛而歿人皆悲之

樓璉

金華人以明經歷官藍田縣知縣廣東道
御史洪武間謫戍雲南後詔還有居夷集

平顯

字仲微杭州人洪武間應孝弟力田為廣西藤
縣令降主簿尋謫戍於滇博學能文西平侯沐

英請於朝除伍籍為
塾賓著有松雨軒集

費良弼

吳興人洪武初以蘇州太守謫戍來滇每旦
探甲執爰登陴風雨罔懈西平侯沐春禮遇

之為建庖室於城舖之側以幼軍一人置爨忽數
日堅卧不起西平遣人候其疾弼曰疾痛則無宮
車已晏駕矣後十餘日哀詔果至蓋夙精天象也
初崇正門在西南直下羊市街弼言其不利因改
闢於東尋
名為博士

寇鼎

字良用偃師人年十二能詩隨父比部郎克仁戍滇後以文學舉郡庠博士不就著有池蛙餘

響啟蒙

韻畧

遼昶

字光古懷慶人洪武初戍滇通經術能詩賦著有方外集

陳謙

字以遜蘇州人寓昆明別號禾齋能詩有禾齋集

蘇珵

號信菴池州人寓昆明能詩有信菴集

董菩

字德善號蒲石生鄞縣人寓昆明能詩著蒲石集

劉有年

字大行沅州人洪武中以明經薦拜監察御史尋辭職養母忤旨罰輸通州站役檢閱儀

禮逸經十八篇上之命付史館建文中起知太平府有治聲北平師至有年不迎安置昆明與王忠

文子紳道義相許黔國知其賢遣子就學常有寓軒詩曰乾坤間氣中物各有所寓俯仰觀宇宙萬物森然具鴻鴈翔翔南蜉蝣寄朝暮軒居悟深情於焉幾居處嘯傲心獨明其中得真趣後交趾平起擢按察司僉事卒於官

鄭旭

字景初閩縣人洪武十一年以學行薦為國子堂儀上幸太學親選才德兼備者十人以傅太

子旭居第二後以蜚語謫雲南建文時起高安學訓導卒旭精心經學著有詩經總旨初學提綱咏竹書稿等

朱琳

字士林泰興人洪武間以詩累安置雲南

李儼

字民望籍貫未詳永樂間湖廣僉事以忤旨戍滇寓晉寧為人剛正里有爭悉質之卒以客終

耿琦

字慎安鳳陽人太學生明初泗國公耿再成孫都督耿忠子正統間遊於滇卜居晉寧雅好詩

書不樂仕進卒葬州東萬松山黔國公為置墓田碑記子孫世居於州

王曇

字夢雲號芸窻山陰人博學通經史尤工於詩正統間代父從軍雲南人延為塾師教誨里閭

子弟皆知向學著有芸窻吟稿

劉福成

字以德別號元崖山人浙江開化人善風角推步正統初從王驥征麓川再從侯璉征貴

州多所贊畫冠平予之官不受附籍宜良年八十餘卒

黃良卿

字廷正號硎山江西撫州人博學能詩嘉靖間遊宜良鄉人延為師一時士大夫多出其

門

陳振琦

號二韓黃巖人博洽能詩尤精鍾繇書法結社為文一時風雅宗之崇禎末年任安寧州

守後棄官居宜良今鳳山之原有二韓先生墓

鄧凱

江西吉安人明末舊臣後祝髮為僧寓居昆陽州守童復晤為結庵於陽光寺後以詩自娛時

或狂嘯痛哭居數年還籍

曲靖府

明

彭綱

籍貫未詳弘治間以翰林謫戍曲靖有才能郡中學者師事之多所成就

諸葛元聲

不知何許人萬厯間隱名為諸昌貞至郡以賣筆為業一日見郡中諸生會課閱其

藝曰諸公文固佳但題旨尚未透徹援筆改正數藝羣相推服因請入書院教授生徒所著有咏水

集五經闡蘊詩雅詞林等

集後與弟元敬歸故鄉

熊週

字六有江西臨川人淹貫經史兼工書畫萬厯間遊學至陸涼州人士從受業者為文皆有法

度可觀由是生徒日衆遂家焉提學范允臨見其文奇之有學冠全滇質非凡品之目

吳侯

江南江寧人明光祿寺卿棄官遊滇寓居羅平大灑馬邑為人端方高潔著有紛游草惟暉堂

等集

王有詔

字世綸蜀人明末隨父宦黔中因流寇陷蜀舉家被害寓宣威讀書談道性情和藹年九

十餘雖盛暑必整衣冠能作小楷如米粒大勻淨端莊森然可法人稱有古君子風

潘昌

字燕如號裕庵浙江山陰人博學能文尤長於詩弱冠挾策入都不遇放懷山水到處輒有題

咏明末寓宣威與郡刺史王鼎鉉相交善郡人士學詩詞者皆師事之著有方城草滇南草數十卷

臨安府

明

王奎

字景常松陽人洪武初任懷遠教諭累擢山西右參政以事謫戍臨安博洽多才詩文高古滇

士多從之遊後召還修高廟實錄遷翰林侍讀永樂間陞學士有南詔玉堂稿

韓宜可

字伯時山陰人洪武間山西布政同王奎謫戍臨安行誼純篤能詩文一時士大夫多尊

禮之使子弟受學後陞都御史臨安立二賢祠以祀

王文德

山西文水人由進士洪武間除岷府長史王不法遂棄官遊滇家於河西

解守

江南句容人為諸生有文名洪武二年選為邑訓導被誣謫戍河西洪武三十二年以軍中通

經儒士召入翰林除江西袁州府訓導欲大用會北平兵至以建文舊臣仍發戍所隱居教授邑士

多出其門

常昇

懷遠人開平王遇春次子襲封開國公以抗北平師安置臨安尋以憂死

常繼祖

昇子永樂間安置臨安攜其祖像以隨尋召至京賜鈔幣遣歸生子寧寧生復弘治五年

錄功臣後曰常遇春佐皇祖定天下有大功今其子孫降在氓隸朕甚不忍其加恩承祀乃以復為

南京錦衣衛指揮使嘉靖間又封昇裔孫元振為懷遠侯

李灝

字仲和臨川人天順間入滇至石屏與學正王驥詩文倡和給事中羅晟敬禮之

趙友能

籍貫未詳官御史以事謫通海結獨秀軒於秀山古松下王奎有記

楊明哲

清江人孝廉成化間由四川丹稜教諭左遷石屏河泊所益肆力於文諸生執經問字屢

常滿焉所著有述古集

閻閔

山東臨清人嘉靖初吏科給事中謫蒙自縣丞寓建水作正己堂記後召還閔在臨安探巖穴

之勝今有山洞即以閻名

尹革

河南人嘉靖間任兵科給事中時楊慎以議禮謫戍革上疏諫亦被斥為太和縣丞因寓蒙自

遂家焉

趙雪濤

江西人多技能先世宦滇因遇變流落臨安隱於市計所得足一日費即閉門賦詩書學

董其昌甚工後遊雞足山莫知所終

劉孝思

字維則湖廣攸縣人能詩明末入滇至石屏州牧聞其賢館焉抱疾自知不起取所著詩

文盡焚之衆定於南壇之陽

吳鼎

江南人官禮部因流冠之變託跡緇衣歷覽名勝寓居薈峩著作甚富

畢山人

初不言其生平明末遊至石屏愛異龍湖島遂寓焉常為人相地有奇驗一日危坐語人

曰予逝矣揀書籍詩草焚之尚遺有手鈔陰符南華諸書今州西有畢山人墓

黃河清

號陸終子湖廣江夏人因流冠阻於滇初寓臨安東門市後慕石屏山水之勝遂往棲焉

精易學星算尤長於詩多感慨
激烈之致卒葬州西黑龍坡

澂江府

元

伊喇

蒙古人官右丞遊滇至澂江愛華藏寺山水遂
卜居其地以詩書自娛足不履城市卒葬於寺

之半
山

明

張澂

河汾人元末舉進士授迪功郎洪武
中因事南遷寓於澂江以文學名

王昭

字仲彰贛縣人官陝西監察御史洪武間
以言事謫戍河陽教授生徒多所成就

李彥和

長興人洪武間請戍於澁能詩文邑人士多從受學

李恂

彥和子工詞翰隱居教授士林重之

劉蒞

字文季四川富順人明翰林寓居河陽工詩文風流豪放鄉士大夫多從之遊著有愛蓮軒集

萍滇
信筆

本朝

陳文偉

江西舉人流寓路南有學識尤精於易學者各得其傳

武定府

明

程濟

績溪人建文時官編修精邵子先天之學北平兵入帝落髮從水闕出濟易服為道人隨帝至

滇未幾遍遊蜀粵吳楚而往來嘗住武定獅山濟委曲翼衛歷四十載供給使令聽順無忤嘗奉命述從亡傳藏之山巖名從亡隨筆正統間從帝還京入大內乃嘆曰今日方終臣職矣復還滇焚庵散徒今獅山有建文祠與像並祀從亡諸公

郭節

連州人建文帝舊臣也帝出亡節變姓名號雪舫和尚因尋帝至滇常振衣千仞出袖中一冊

朗誦不知何書見人至仍貯袖中避他處每登獅山盤陀石上亦取袖中冊讀之去來或經年後不知所

黃直

常州人累官侍中改按察使建文帝出亡直道遊夔慶間永樂七年入滇訪帝偶遇馮淮於市

一見愕然相持入山哭語移日且言此後無復相見至十年復入滇與淮會同還病於途帝自衡山歸見之

馮淮

黃巖人官刑部司務永樂元年從建文帝出亡至滇止永嘉寺變姓名稱馬二子或馬翁或塞

馬先生尋奉命去十年復至滇時帝先出遊衡山訪淮淮不遇題詩寺壁云夜夢何奇特龍飛天漢津朝回滄海曲夕過滇池濱光霽皆五色蜿蜒無損鱗淵田變化間張主藉高旻比見黃直來相持哭密語竟日即劇詩去帝聞淮至滇亦還於途間蕭寺廡下見二病者即淮與直也俄俱死葬於寺東帝題其石曰兩忠之墓

葉希賢

松陽人

楊應能

杞縣人建文時葉官御史楊官吳王府教授建文帝將出亡發

高帝遺篋有僧牒衣具三帝與葉楊遂分牒祝髮
為僧帝名應文葉名應賢楊仍名應能葉楊與程
濟等終始隨帝備歷諸險以永樂元年至滇永嘉
寺後徙居永昌白龍庵帝與程濟東行留二人守
庵及帝還庵為有司所毀葉楊等遂從帝遊浪穹
構茅庵於赤壁山下程濟筮之得剝之坤濟曰剝
盡而順吉也然龍戰之詞有凶永樂
十年三月楊卒四月葉卒並瘞庵東

程亨

澤州人檢討建文
從亡臣同入滇省

焦雲

籍貫未詳永樂六年同黃直
至滇七年從建文帝東行

史仲彬

吳江人為徐王府賓初建文帝出亡曰吾今
往滇南依西平侯彬曰不若且止於是至吳

江主彬家兩閱月由襄陽廖平家乃抵滇時永樂
元年正月也二年帝復至彬家留三日制衣履而

去八年彬偕程亨郭節來滇尋帝各獻方物十五年彬復赴滇遇帝於大喜庵二十二年彬來滇訪帝相值旅舍因同至彬家宣德九年帝以會稽之遊至吳江時彬已死帝慰勞其子悲悼久之

謝秉鉉

字石生浙江山陰人明末守武定勇於為民不避權貴解官後貧不能歸武民愛戴迎居

和曲西村後卜居祿勸念多村因家焉尋卒元謀令馬之鵬為立墓表

元江府

明

周官

江西人美丰儀能詩工草書性剛直敢言明末棄官遊滇從臨安入元江一時士人多所請正

後卒
於郡

本朝

鄧魁春

號梅菴江西撫州人學問綜博能讀百氏書尤工制舉業順治元年遊學至元江教授生

徒宏獎後進郡中人士多所成就

大理府

唐

杜光庭

青城人寓滇以文章教蒙氏嘗書蒙詔德化碑精妙有法卒蒙學士爨泰葬之於玉局峯

麓其子死葬騰衝龍鳳山清平官張羅疋並為立廟按宋居白幸蜀記光庭杜陵人遊成都隱青城

山年八十五卒於蜀第舊志載光庭卒葬又實有據並存其說以備叅考

鄭回

籍貫未詳西瀘令為南詔所獲尊以師禮使教其子弟後說南詔歸唐

明

汝南王有勲

周王曄次子永樂中封汝南王得罪於父文皇遣至雲南居大理能詩文所著

有無為

寺記

鄒衢

湖廣興國人永樂初任鶴慶府經歷廉介不苟秩滿不能歸寓於趙州子孫蕃衍世有科第

穆孔昭

不知何許人天順間寓居浪穹善吟咏逢人輒教以孝弟所居不蔽風雨非力不食作竹

枝詞寓化導

鄉俗之意

謝廷范

號古溪四川富順人嘉靖間吏科給事中言事謫太和縣尉以風節稱

許鴻

字子羽福建人明末宦滇後因兵亂卜居太和之古生能詩興至輒攜一觴於水邊柳下吟咏

自適先是遇兵變斷其右掌以左腕書能作懷素大草鴻以左腕自號人亦稱為左腕云

汪蛟

字辰初徽州人明末宦滇以中原多故避亂至榆愛太和古生傍水因僑寓焉博學工詩為人

簡靜有志操
後歸黃山

朱蘊鑑

武昌人明末宦滇值沙定洲孫可望之變遂祝髮為僧名不錯字衷白結庵於浪穹縣之

標山題曰楚雲坐卧三十年惟與唐泰相往來善奕工吟咏

徐弘祖

號霞客江南江陰人性好遊覽遍歷天下名勝崇禎間遊至賓川愛雞山之勝遂止焉著

雞山志四卷
後以病歸

楚雄府

明

黃輔

巴縣人成化間以舉人任南安學正後寓廣通聚徒講學士類賴其陶成卒知縣蔣哲營葬於

東山今其子孫猶在南安

蔣良珙

湖廣黔陽人崇禎乙亥拔貢任新化知州有威惠聲後署南安篆值土酋普沙煽亂撫輯

甚勞及流寇入滇棄官隱遁於磬嘉之竹箐寇帥聞其廉能屢遣使徵之堅節不屈尋卒

姚安府

唐

李善

江夏人有雅行淹貫古今號為書簾顯慶中累遷崇賢館直學士兼沛王侍讀為文選註數析

淵洽表上之賜賚頗渥出為潞王府記室叅軍遷涇城令坐與賀蘭敏之善流姚安遇赦還

明

黃守鍾

江西人宋黃庭堅之裔宦於姚遂家焉

契士忠

江南溧陽人明學士傑斯之裔官於姚有惠政因卜居焉

永昌府

元

托克托

蒙古人順帝時為中書左丞至正中自請出師討徐州賊朝臣上章留行不果遂假便宜總制

兵馬破賊於徐州又破張士誠於高郵城外哈瑪爾思功嗾御史表賽音等劾之詔削官爵安置淮安龔伯遂曰丞相常受密旨宜一意進討且勿開詔托克托曰是與天子抗也如君臣何遂受詔既而臺臣又論其譎輕再徙雲南之騰衝知府高惠欲事以女辭曰吾罪人也安敢念此後再徙阿恰齊之地哈瑪矯詔遣使鴆之

明

范從文

字復之崑山人文正公十三世孫洪武中以國子生奉使稱旨擢監察御史改戶部總部

主事以罪謫戍莊浪復改戍金齒十年赦歸以薦為金華訓導所著有小學章詒宗牒譜遺後齋集

若干卷

姬思忠

樂亭人元參知政事洪武初歸附授監察御史後以事編置金齒律身以禮夷俗化之

劉寅

嶧縣人洪武庚戌進士江西僉事謫金齒貨藥訓蒙所著有武經直解傷寒脈賦標幽賦註其

自銘曰少遊滹陽老滯永昌道不遂其初志心終焉而遑遑研窮典籍著述文章愧無補於名教徒取笑於大方知非思改得善慮亡幸獲享於中壽即九原而徜徉萬厯間巡撫陳用賓祀於會城與漢王褒明楊慎為三賢云

高莘

山東人洪武中以起居注謫戍金齒時武臣強橫累欲延為館賓免其役莘不從乃使之守門

終日執爨會大雨彌旬衣履狼籍殊無戚容其耿介如此

葉學則

德興人博雅善歌詩洪武中召對稱旨擢奉訓大夫後謫居永平以文雅化俗

周志鉉

字元亮永安人進士洪武初官翰林以事謫戍金盞精春秋人稱節孝先生

徐有貞

初名理字元玉吳縣人天順改元以迎復功特進柱國武功伯尋以論誣殺于忠肅罪編

金盞居歸休庵一小室執爨守城不異行伍三年賜還

易恒

字可久長沙人正統中戍昆明復徙騰衝積學篤行郡人賴其薰陶善書工詩文著有思誠稿

楊慎

字用修四川新都人父廷和以無子禱於神夢神以五代夏魯奇應之曰武臣也輔以中庸十

八章遂生慎年十一擬過秦論後舉正德庚午鄉試第三辛未會試第二廷試第一授修撰嘗奉命

祀江瀆以父命見楊文襄公於京口觀所藏書無不言言成誦慎大懼益發憤讀書武皇數遊幸慎上書諫不報遂移疾歸世宗繼統起慎為講官講尚書金作贖刑篇言大慙不可贖蓋指罪璫張銳

于經等以進金得免云會大禮議起慎同毛澄范
鰲毛玉諸臣力諫又公倡跪門之議帝怒下慎獄
十日內再杖之創甚斃而復甦遂戍永昌時滇之
御史郭楠上疏乞宥議禮諸臣被詔下獄自是無
敢救慎者居頃之安鳳變起困木密所慎戎服往
援與副使張義謀固守官兵與賊戰城外慎促城
內兵開門夾攻之賊敗去安寧守欲權民鹽牛稅
慎謂此刀錐者宜推與民軍官以濬海口役為利
督丁夫六千人下海民苦之慎作書箴告當事俱
報罷戍滇三十五年凡兩迤郡縣名勝皆與其士
大夫相倡和放浪湖山究心著述暫歸蜀者再晚
欲長歸已七十餘而滇士有讒之撫臣王昺者昺
俗戾人也使四指揮以銀鐺鎖來慎不得已至滇
則昺已墨敗然竟不能歸病寓蕭寺以歿喪還藁
葬新都北門外數百武穆宗即位贈光祿少卿謚
文憲昔穀廟問注張星歷官不能對以問慎慎曰

柳星也世廟問喬宇鬼瑣四字慎即舉荀子非十二子篇以對其後詢明第一博聞之士或曰慎世

廟為之

默然

程源

四川人有才名崇禎進士知明運將終不受職遜居永平山中為亂兵所害

祝瑾

德興人儒士性耿介工詩文尤善易謫戍騰衝尋宥歸從學者留之講易遂家焉年七十餘猶

讀書
不輟

季思友

不知何許人工於琴寓保山蕭寺時有紅光滿室嘗鳴琴以自樂詩云焦尾絃難續思賢

憶幾回不同箕子操堪比蔡邕微片片黃花落聲聲柳絮飛陽關人已遠秋雨掩柴扉

周東華

不知何許人本姓崔明李甲申之變自燕京遁至騰越改姓名為周東華居騰之寶峯寺

嘗數月辟穀口不談釋道之言人以儒理叩之則
齋壺不倦曾題毘盧寺一聯云殿古含煙冷棧空
得月多騰諸生吳茂桂等延於雪山師
事之著有雪山集二十四篇後更隱去

吳延齡

字永壽餘姚人以賢良薦授清潤教諭因上
言謫戍大理後調騰越遷跡屯伍以終其身

鶴慶府

明

車文琮

臨川人父業商寓籍劍川生文琮幼勤學登
鄉薦知彭山縣有廉聲卒於官郡人士多出

其門

宋守拙

字王賓蜀人以明經佐貴州思南府有惠政
尤善詩古文辭解組後家於鶴拙言行端方

里黨服其嚴正長子珍德
守其家訓人稱有父風云

黃河圖

字十五籍貫未詳明戶部主事棄官尋訪天下名蹟至鶴因家焉善詩尤精皇極經世學

順寧府

明

曹應昌

號石霞麻城人明崇禎己卯解元癸未進士博學多才父巽之明末為雲州佐解官居順

寧尋卒應昌來滇迎櫬資斧不給遂寓順凡山水名勝多所題咏後卒於滇大理府推官楊兆傑挈

其櫬

歸

陳璠

字瑕無四川內江人明崇禎間仕至戶部員外後棄官來遊順寧太守請於育賢館談經以授

學者郡士多出其門所著有才子驚夢集五卷有賢館志四卷

本朝

楊應鶚

閩東人任貴州貴陽府同知吳逆叛因不受偽職安置順寧大兵入滇偽留守郭壯圖恐

鶚倡衆內應移檄偽將令致之死鶚遂自縊其側室佟氏先投繯死雍正三年知府范溥訪其藁葬於荆莽間為起雙墓立碑記之

永北府

明

周良臣

湖廣人舉神童正德間聞北勝有神童張宗楚不遠三千里訪之因寓居焉

麗江府

明

敖毓元

江西新喻人進士成化二十一年因奏劾李孜省僧繼曉謫為麗江臨西縣丞博聞強記

淹貫經史著有鐘彞集後起擢
衡州知府累官禮部左侍郎

蒙化府

明

王汝敬

字敬夫山西代郡人寓蒙教授生徒敦尚禮法蒙俗一變後回籍成進士名重晉陽時謂

之山西

王道學

曹學

字行之號大狂蜀人嘉靖初客遊滇西性豪放能詩草書道勁更精於畫性嗜酒居榆之中和

峯日繫錢與壺於驢背遣入城市酒人知為曹之驢也取錢貯酒復遣而歸偶雪夜墜驢驢以身覆之得不死後同楊慎寓蒙居數年卒他日驢經其墓躡躅哀鳴撞死於側

張登雲

貴州烏撒人寓定邊縣會裸賊屯營七顆哨登雲謀劫其營賊覺悉衆渡河登雲左持弓

右執刃所向披靡斬賊先鋒賊圍之斫其左足登雲猶奮勇直前兵敗被殺

雲南通志卷二十三

欽定四庫全書

雲南通志卷二十四

土司

附種人

滇固西南夷也漢時始置郡縣隋唐置羈縻州顧自都督刺史太守外皆如諸葛武侯之治因其渠率而用之自元及明始廣設流官治以中土之法然明初土司猶三百二十餘人末年存者不及其半蓋皆憑恃險阻豕突狼奔覆族隕命耗矣我

國家底定西南土司奉命者世襲有罪者革除靡不服教畏神洗心滌慮而雕題鑿齒卉服穴處之民亦知襲衣冠習文字何翕然丕變歟至於南掌獻琛撻夷奉賁尤為曠古未有豈非

聖人在上德澤涵濡無遠不届而阻深閭閻咸獲昭蘇哉若其風土俗尚服食居處有不同者別而錄之以備象胥之紀亦徵王會之盛也志土司種人附焉

雲南府

羅次縣鍊象關土巡檢

元時李堵為防送千戶明洪武中從征歿於陣錄其子阿

白為巡檢傳十一世至李文秀本朝平滇文秀投誠仍授世職文秀死子廉傑襲廉傑死叔昆秀襲昆秀死子廷傑襲廷傑死今子清臣襲

祿豐縣南平關土巡檢

元時李喜怒為土官明洪武中子李矣以宣諭各蠻陞巡

檢六傳至李印以征阿克死於陣無子以李矣次子李羅綺之第六世孫李惟賢襲惟賢死子楚南襲

本朝平滇楚南投誠仍授世職楚南死無子公舉以嫡支李印之同祖弟惟白襲惟白死子文南襲文南死子天渥襲天渥死叔秀南襲秀南死今孫毓俊襲昆明縣赤水鵬土巡檢阿剌馬丹明洪武中從征陣

亡錄其子馬速魯麻為巡檢久裁
羅次縣土知縣楊大用明洪武中歸附至楊正授土
知縣世其官傳至似震於本朝順治十七年投誠
仍授原職後以無軍功不准世襲兩迤諸土官先經
投誠投職後復革除者皆以此

安寧州土知州董節明洪武中開滇率衆為鄉導討
董定有功尋以入貢授奉訓大夫安寧土知州久裁
宜良縣湯池土巡檢明正統中馬娜以通事偕使臣
入三宣導諸蠻貢方物錄其子為巡檢久裁
清水江土巡檢李保明永樂中以通事授土巡檢洪
熙中李賢入貢進將仕佐郎久裁

曲靖府

平彝縣土縣丞

元末龍海為土官明洪武中歸順改
其地為越州以海知州事及海子阿

資叛伏誅其地分屬霑益陸涼永樂初資子祿寧詣
闕奉貢詔授寧土縣丞與亦佐沙氏分土而居傳至
海潮以功加土州判浴至自明子澗本朝平滇澗
投誠仍授世職康熙八年裁縣安插闕於越州澗死
子細乾襲細乾死弟納乾襲二十四年改平彝土縣
丞納乾死一清襲一清死今從弟藏珍襲

土知事楊光初為騰衝守禦千戶所吏目明正統三
年思任屠騰衝獲光去二年後光自麓川脫歸以賊
情形告因以金帛令結麓川百夫長刀烏猛期與合
兵圍賊攻江東西刀剛貢曩諸寨皆下之奪其浮橋
大軍得以畢濟麓川定論功改守禦千戶所為指揮
使司陞光府知事遷曲靖府久革

南寧縣白水關土巡檢李檜芳明初以行伍從指揮
李觀克大理烏撒有功授世職至承恩絕

霑益州土知州元時安舉宗為曲靖宣慰使明初開
滇有祿哲妻實卜與夫弟阿哥歸順卜授烏撒土知

府哥授霑益土知州傳至九鼎世絕以烏撒安紹慶繼實祿哲七世孫也紹慶死次子紹良襲兼署烏撒府事及死以長子其爵襲烏撒職次子其祿襲益職其祿傳重鎮重鎮傳安民本朝平滇安民投誠仍授世職安民死子世基襲以橫暴為其下所訐改其子于蕃襲雍正四年于蕃以不法革職遷置江寧於其地置宣威州

隴川改宣慰司恭項明正統中以討思任功改麓川為立構兵焚司治項奔省城鎮撫發兵討之木立懼自縊死朝廷以民既不與恭氏不可復令守土而又不沒其前功遂仍以項為宣撫司安置曲靖世其官傳至恭默以其地歸霑益州職除松韶闕土巡檢李英明正統中從征麓川有功又從

大兵解赤水圍世其官傳至舒和世絕陸涼州土知州阿納明初內附授知州治及資曹以

軍功陞府同知傳至資世守以罪戍邊職除馬龍州土知州沙氏常氏皆久革

羅平州土知州者洛元時阿邦龍少為酋長後叛誅之以其地與施氏元末施宗施秀以荒淫廢事洛本需益土舍襲據其地明初歸附投土知州萬厯十三年者繼榮叛巡撫劉世曾討誅之改羅雄為羅平設

流官遂革者氏世職

尋甸土知府安氏明洪武中設尋甸軍民府以土司安氏領之裁為美歸厚二縣宣德間改為仁德府領高明馬龍二州復為美歸厚二縣以安氏世襲知府事成化十三年安賜安迺爭襲內亂遂改尋甸府設流官降安氏為營長嘉靖六年知府馬性魯以徵糧繫安賜孫安銓之妻於獄裸而撻之銓怒遂叛攻尋甸討誅之革其職

易隆土驛丞奄索初為尋甸把事洪武中從征有功授土驛丞世襲至奄榮世絕

平彞縣左縣丞沙普額明初歸附領縣事後降縣丞
傳至運泰職除

臨安府

納樓茶甸土副長官司

明初普少歸附授副長官歷
傳十一世至普率本朝平

滇普率投誠仍授世職康熙四年率附王祿叛官兵
討之乞降赦之以子向化襲向化死子仁襲仁死今
子天民襲

虧容甸土副長官司

元時阿附為鐵容甸部長明洪
武中歸附賜姓孫授正長官司

傳九世至孫大昌本朝平滇大昌投誠授副長官
司世職大昌死子永祚襲永祚死今子世基襲

納更山土巡檢

明洪武中龍嘴以開荒有功給冠帶
管理地方尋授土巡檢傳子龍政沿

至龍統龍昇龍天正 本朝平滇天正投誠仍授世職天正死子在田襲在田死今子躍襲

恩陀甸土副長官司遮比明洪武時授副長官傳遮虧虧傳習習傳宗宗傳白白傳祥洽至李秉忠 本

朝平滇秉忠投誠仍授世職秉忠死承爵襲承爵死世絕

左能寨土副長官司舊有土官獵豆傳至龍勝安龍上登素桀驚不聽道府鈴束革職 本朝平滇有吳應科投誠以非滇志所載下臨安府考其世系其先有吳蚌頗為左能土官生舖且舖且生應科歷代相傳因授世職後無人承襲

落忍甸土副長官司明洪武中他有授副長官傳廷珪廷秀及陳國誥為溪處錢覺平所殺洽至國賓本朝平滇國賓投誠仍授世職後無人承襲

溪處甸土副長官司束克明初歸附授副長官越數代無姓不知冠帶自知府陳晟授以趙姓洽至恩洪

恩禧恩忠 本朝平滇恩忠投誠仍授世職康熙四年附王祿叛伏誅職除

瓦渣鄉土副長官司明初阿因歸附授副長官沿至錢覺耀於 本朝康熙四年同恩忠叛斬之

教化三部副長官司菽乍明洪武初授職傳至張澤無子撫龍得勝為嗣生明明生長壽復龍姓名昇

本朝平滇龍昇投誠仍以張長壽為名許之授世職康熙四年附王祿叛誅之以其地為開化府設流官

安南副長官司元時以蒙自縣地近交趾以勐蠻捨資為安南道防送軍千戶明初土官那由以其城歸

附授副長官正德六年那代作亂誅之王弄山土副長官司阿額明洪武中授職傳至阿乍

烏珀烏志得烏騰鳳烏高舉後不知所終萬曆三十八年有土人沙源以所部兵斬賊有功委掌王弄山

萬曆四十三年從征交趾源擒偽勝智侯及阮文美等又以安南地界之令阻截交路後赴援破安効良

於嵩明遂授宣撫司源死子定洲謀叛據會城李定國擒斬之其黨王朔遂有王弄山安南之地本朝平滇朔投誠授世職康熙四年朔與祿昌賢叛官兵討之朔自焚死以其地屬開化

石屏州里長龍在田明崇禎間普名聲叛田領鄉勇征戰以功授守備後調湖廣授都督尋故子韜於康熙

四年附逆族誅

阿迷州土知州原普氏明天啟中普名聲以功授宣

慰司以其子祚遠襲土知州後名聲作亂死其妻萬氏贅沙定州竊據滇省李定國擒斬之李阿則者州

之土目也本朝康熙四年定洲之黨王朔反攻臨

安阿則遣子思敬與官兵夾擊平之遂授土知州世

職阿則死子思敬病廢孫廷樞襲廷樞死弟廷正襲廷正死子純襲雍正四年以侵盜錢糧革職安置江

西

寧州土知州元時普捷為畝町路宣慰司明初開滇

有弄甥者迎師有功賜姓祿授土知州治至普奉以專橫伏法遂降州同以祿世仁為之後傳祿紹先討岳鳳有功復土知州傳至祿華誥討羅平有功加秩至運同華誥傳子厚厚傳子溥溥傳弟洪洪傳姪永命永命傳叔澠澠傳弟昌賢本朝平滇昌賢投誠仍授世職順治十七年降州同明年以舉首梅道人等謀逆復原職康熙四年以叛伏誅土州判本朝康熙十九年復滇有李者祿投誠准世襲州判者祿死占鰲襲占鰲死雲鰲襲雲鰲死實寶襲至國勲世絕停襲

岷峨縣土知縣元時阿只為阿楚軍民總管明初祿美歸順授土縣丞尋以功陞知縣弘治間專任流官而以土官巡捕治至祿益叛遁江外本朝平滇益投誠仍授世職康熙四年與祿昌賢等叛職除土主簿王添祥明永樂間從征麓川有功授主簿治至王烈傳弟然然死無子叔揚祖襲本朝平滇揚

祖投誠仍授世職康熙四年與祿昌賢等叛伏誅職除

蒙自縣土知縣元總管阿只孫明初以蒙自歸附授土知縣傳陸欽陸榮陸剛陸仁弘治時改設流官職革

土縣丞李世屏其父日芳係明時目把李輔舜子附沙定洲竊據蒙自日芳死子世藩世屏附祿昌賢叛平之俘世藩世屏降充大理軍吳三桂叛授偽總兵襲本朝復滇復繼偽劄投誠止授蒙自土丞不准世

澂江府

新興州土州判

本朝康熙十九年復滇新興州土人王鳳授偽遊擊職迎至廣西路投

誠隨剿石門坎馬別河黃草壩皆有功授土州判世職鳳死子迪吉襲迪吉死今子遴襲

河陽縣安插土官刀門俸初為鎮康土知州明正統中從討麓川克上江深入灣甸直搗緬地累功陞孟定知府以其子刀斑線為鎮康知州後門俸入貢思氏餘孽思笑糾木邦攻鎮康殺斑線掠其金牌印信復攻孟定門俸次子刀孟不能支挈家奔永昌時王驥班師未久不能復征因安置門俸於潞江襲至刀宸子韜本朝平滇韜投誠止給劄管理西南二門土軍防守府城仍准世襲沿至廷俊裁革

江川縣闔索嶺土巡檢李實明宣德元年以地險設巡檢於嶺上因以實為之七傳至振文於崇禎十三年督弓兵築寧州城後沙賊破城合家死難

新興州鐵爐關土巡檢王爵初為通事明正統中以從討麓川功授巡檢後建闕於鐵爐山授世職五傳至王先榮本朝平滇投誠授世職康熙四年同王耀祖叛削除

路南州土知州秦普明洪武中歸附授州同永樂中

陞知州傳至祿普及福無子至成化中設流遂失其官

武定府

土知府鳳氏其先弄積妻商勝明初倡衆歸附授土知府其三世孫阿英始改姓鳳英子朝文及孫繼祖叛平之改流官授鳳歷府經歷後每朔望夷目咸稽首於其幕知府劉寅慮為後患密請於巡撫陳用賓以他事殺之萬歷丁未阿克自稱鳳氏裔作亂官兵擒斬之

和曲州金沙江土巡檢李安吉娜明初以部尉從觀音保降後從沐英攻烏撒及征越州累功授巡檢後絕

摩耳山巡檢劉保山亦以觀音保部曲歸附諭烏撒永昌越州功授巡檢世職尋裁元謀縣土知縣阿吾元土知縣廣哀之子楚夷也明

初歸附令招諭縣民仍世襲土知縣後改流革除其裔吾大用於安銓鳳朝文之變有殺賊功至天啟中有大用曾孫必奎以從討安効良累功守備後復叛斬之

廣西府

土知府昂氏明初普德歸順授彌勒州土知州尋陞廣西府知府成化中昂貴以不法革職設流

改調土照磨高仁義為姚安府土同知高賢族兄從定西伯蔣貴攻麓川累功授姚安府照磨賢死子高貴襲于仁義為從子而官居其上以為嫌因調廣西世職巡緝浴至齊嵩世絕以親支文啟襲後革除師宗州土州同其先有普思者元時為武德將軍世襲知州明初阿的歸附授州同傳至孫瓏哥遂以瓏為姓浴至瓏耿遣李璜赴京請襲璜竟請改土設流職除

維摩州土知州資氏世領州事設流後資高資金相繼作逆州治為墟資金後為家奴所殺祀絕

廣南府

土同知

元時儂郎恐為宣撫有二子長布哈次正祐明初布哈子郎金歸順授土同知死無嗣正

祐襲後以罪死至洪熙時儂郎舉緣事降為通判郎舉死子印祖襲正統中以征麓川功復同知傳至文舉歷有戰功文舉死應祖襲從官兵征三鄉親獲賊首阿機等賜白金百鎰後又以征吐蕃尋甸功賜四品服應祖死子紹周襲隨征東川尋甸有功授土知府紹周死子鵬襲本朝平滇鵬投誠授同知世職鵬死子繩英襲繩英死子振紀幼妻嚴氏撫孤攝事振紀旋死庶子振裔辦理地方事務

土富州知州

元時沈郎先為富州安寧二州土官子永秀梁王署為元帥明洪武中永秀歸

附尋死子大忠嗣守邊有功授知州傳十四世至崑
瑞本朝平滇崑瑞投誠仍授世職後以罪黜弟崑
城攝襲尋死姪肇乾襲雍正八年以犯法革職委其
子燦學習辦事

元江府

新平縣土縣丞

楊宗周舊係魯魁山賊目本朝康熙二十七年臨安知府黃明同總兵

馬山招撫向化授宗周土縣丞世職宗周死子世恩襲世恩死今子昌祚襲

味土巡檢

普為善舊係魯魁山賊目於本朝康熙二十七年同楊宗周受知府黃明招

撫授土巡檢世職為善死子永昌襲永昌死今子成忠襲

土知府那中明洪武中率衆歸附授土知府嘉靖中
那鑑為亂布政徐樾率兵討之鑑縱象馬躡官兵樾

中流矢卒鑑懼自殺遂革其官令臨安衛指揮往署之印猶藏那氏家每官書移指揮取印必以夷兵縫擁伺之署訖復擁去其裔天福篡兄自立洽至嵩本朝平滇嵩投誠後與許名臣等叛討平之改設流官

新化州摩沙勒土巡檢普寧明洪武中歸順授土巡檢傳至榮榮傳弟從化從化傳治治傳天曉本朝平滇天曉弟承勲投誠授世職康熙四年土司叛承勲遜去

新平縣南碕土巡檢易速明初歸順授碕峨伽羅關巡檢萬厯中易體乾隨征蠻賊建立新平改調南碕巡檢傳弟體元體元傳弟象極本朝平滇象極投

誠仍授世職康熙四年附王祿叛斬之結白土巡檢方從化舊係魯魁山賊目本朝康熙

二十七年臨安知府黃明招撫向化授土巡檢洽至繩祖於雍正三年以不能約束夷衆停襲

楊武壩土巡檢李尚義舊係魯魁山賊目 本朝康熙二十七年投誠授土巡檢至二十九年復叛討擒之

開化府

土經歷

周應龍本開化府猓獯 本朝康熙十九年大帥復滇以偽守備投誠從征石門坎黃草壩有功給以總兵劄付於康熙二十二年改授土經歷准其世襲應龍死子榮昌襲榮昌死今子天爵襲

鎮沅府

鎮沅土知府元末刀中旺為元江路總管明初同子刀直刀平歸附授平千夫長領民兵招諭六谷三十寨出任差發後剿刀猛洞及猛婆遺定柴板等寨設鎮沅州以平曲州事永樂中從征八百又從攻石

巖者達寨外夷整線來降貢方物詔陞鎮沅為府以平領之後印為那氏所奪子孫多以冠帶署事傳至刀仁復征那鑑獲印以獻仍給之治至刀允中本朝平滇允中投誠仍授世職子長庚襲傳至刀瀚於雍正五年以貪劣革職安插江寧改設流官威遠土知州明初刀佩罕為麓川土官隨征木邦陣亡以其子莽黨承襲尋設威遠州授知州傳至刀鐸死子漢臣襲本朝平滇漢臣投誠仍授世職子國棟襲至刀光煥於雍正二年以縱匿野賊削職安置江西

者樂甸長官司明洪武末刀木板內附授長官司治至刀晟從剿普名聲有功授宣撫司加遊擊街本朝平滇晟子宗喬投誠仍授世職宗喬死子佩玉襲佩玉死弟佩璋襲佩璋死子聯斗襲雍正四年願繳長官司印請設流官遂改其地為思樂縣授聯斗以九品冠帶

東川府

土知府明洪武十四年開滇祿魯祖歸附授土知府
隸雲南後歸四川改東川軍民府傳至祿千鍾以討
叛夷功加四川按察司副使銜至萬兆又以剿寇功
加布政司叅議銜本朝平蜀萬兆投誠仍授世襲
萬兆死其子永墜永邦永高永明相繼襲康熙二十
一年萬兆妻安氏殺永明以子永厚襲永明妻祿氏
攜印同子應龍奔烏蒙母家赴控督撫二十五年督
撫遣兵護應龍襲職是年永厚死厚妻安氏以計殺
應龍其土目者沙都控於督撫請立應龍之弟應鳳
二十九年以應鳳襲令者沙都護印三十二年著沙
都死三十四年安氏使人殺應鳳祿氏世絕安氏尋
亦暴死三十七年改土設流雍正四年以東川歸雲
南管轄八年營目祿良正等附烏蒙叛擒斬之

昭通府

永善縣阿興土千戶

阿興土夷安永長於本朝康熙三十四年以化諭苗蠻有功

授阿興土千戶給印信駐防檜溪雍正六年米貼祿氏吞都德昌叛永長奉文堵截擒獲德昌等八年德昌土舍木谷四哥等從烏蒙叛挾怨共殺永長今子天柱襲

烏蒙土知府明初阿普効順授烏蒙軍民府知府世其職隸四川本朝雍正四年祿萬鍾以匿奸抗質遣兵捕之配江西改歸滇轄設流官

鎮雄州土知州原為芒部路隴氏世為酋長明初設芒部府隸雲南洪武十六年改為芒部軍民府隸四川仍以隴氏為知府嘉靖三年隴政隴壽兄弟爭立改設流官改芒部為鎮雄軍民府七年夷酋普奴等叛平之仍令壽子勝襲知府職勝傳子清清傳子來

鳳來鳳死妻祿氏更名隴應祥辦理府事水西酋叛
應祥有保固功授貴西道卒封正議大夫子懷玉襲
授大僕卿懷玉卒子鴻勳襲本朝平蜀鴻勳投誠
仍授世襲傳至天成聯嶽聯嵩聯嵩死子慶侯襲雍
正五年烏蒙叛以藏匿奸究革職配江西改土府為
州設流官隸雲南

普洱府

車里宣慰司

即古產里商初以象齒短狗獻至周復
入貢周公作指南車導之歸故名車里

元世祖命烏蘭哈達伐交趾經其部悉降之至元中
置阿里路軍民總管府領六甸後又請置耿凍路耿
凍當孟弄二州明洪武十七年改車里軍民府十九
年改宣慰使司永樂元年刀暹答內侵掠官吏西平
侯請討之上命先以禮諭暹答悔懼還所擄及侵地
遣使入謝景泰元年授刀凱冷宣慰司至嘉靖間附

於緬萬歷十一年官兵擊緬宣慰刀糯猛遣使貢象
進方物兄居大車里應緬使弟居小車里應漢使明
末刀穆禱襲本朝平滇穆禱投誠仍授世職每年
納米一千八十四石隸元江府穆禱死子猛桃襲猛
桃死子召區猛襲召區猛死子金寶襲金寶死今庶
弟紹文襲其地東至交趾南至老撾西至孟艮北至
威遠州西北通孟連界由恩樂縣西南行十一日至
其地山曰猛永曰光山江曰沙木曰九隆民皆焚夷
雍正九年改隸普洱府

大理府

趙州定西嶺土巡檢

元末李清宇為彌只防守千戶
明洪武十七年歸順授土巡檢

傳至李齊月無子弟齊斗襲本朝平滇齊斗投誠
仍授世職齊斗死子替孫天成襲天成死今子紹廷

襲

雲南縣土縣丞

明洪武十六年征雲南有楊奴者率衆歸附授土縣丞正統三年楊宗以

從征麓川功累陞知縣嘉靖十三年楊訓以奉拘景東土知府陶炳被訐仍降縣丞及鳳氏叛訓戰歿詔立祠表其忠萬厯中楊如楨隨征麓川以忠勤著及死子洪襲洪死子玉蘊襲本朝平滇玉蘊子岳投誠仍授世職傳子肇基襲肇基死子國泰襲國泰死今弟國臣襲

土主簿

元末有張興者張樂進求之後世為品甸子戶明洪武中大兵下楚雄興首倡効順為鄉

導招甸民降獻甲馬後又攻石寨有功授土主簿與楊氏分土而居治至張綱死子福曜福星遞襲皆無嗣弟張維襲本朝平滇維投誠未幾死以子祖廕授世職祖廕死今子祚弘襲

鄧川州青索鼻土巡檢

元末楊良為平化州判官明克大理以招叛功授土巡檢

世襲浴至應龍無子弟應鵬襲本朝平滇應鵬投誠仍授世職應鵬死子鎮海襲鎮海死今子國楷襲

浪穹縣土典史

明洪武中開滇土官王藥師以芻粟餉大軍授鄧川州吏目後以征普顏

薦功改浪穹典史每有征調皆以兵從浴至夢祖死子鳳洲襲本朝平滇鳳洲投誠仍授世職鳳洲死姪晉襲晉死今孫之成襲

蒲陀崆土巡檢

明洪武十五年指揮周能典大理衛事以土官楊順充通事招撫蒙化白

崖等處授土巡檢屢建功浴至鳳階死子瞽孫爭先襲本朝平滇爭先投誠仍授世職爭先死子續鵬

襲續鵬死今子遺龍襲

鳳羽鄉土巡檢

元末尹勝為木邦府判明初克大理歸順破佛光寨有功授土巡檢安鳳

之亂嘗從阿氏攻李鎖飛李牙保等寨浴至世忠無子弟秉忠襲秉忠死子德化襲德化死弟德明襲

本朝平滇德明投誠仍授世職德明死今子承祚襲

上江嘴土巡檢

明洪武開滇楊信以芻糗餽大軍從破佛光寨授土巡檢浴至廷舉傳應

接應接傳斌斌傳康國本朝平滇康國投誠仍授世職康國死弟福國襲福國死今子暉襲

下江嘴土巡檢

明洪武開滇何海率土民歸順以破佛光寨功授土巡檢浴至養正死子

光祖襲光祖死子應福襲本朝平滇應福投誠仍授世職應福死弟一清襲一清死今子紹勲襲

雲龍州箭桿場土巡檢

元時有字忠者武定土府之次子也明洪武開滇率衆歸

命授土巡檢後廷宣屢從討安銓鳳朝文諸賊浴至元勲從征奢酋有功陞州同子顯道以明經不願襲職孫題鳳襲本朝平滇題鳳投誠授世職以土州同管巡檢題鳳死子世吳襲世吳死子昉義未襲死孫生文襲生文死今弟生民襲

十二關土副長官

元末李羅賽為防送千戶明初以招附品甸功授副長官傳至作昌

以恢復炎霑功加銜遊擊傳子清以冠帶任事清死子恬森襲本朝平滇恬森投誠仍授世職恬森死

今子高傳襲

鄧川州土知州阿這明洪武中蠻賊高生與故元右丞普顏篤作亂這執忠不屈卒擒高生以功授土知州嘉靖中從征安鳳之亂及從巡撫鄒應龍蕩平赤石崖論功叙賚萬厯中阿榮以護餉征罕建隴川城其後矣堵蠻莫五井諸役咸在行間本朝平滇阿

尚夔投誠仍授世職尚夔死孫震襲震死于炯服襲
炯服死子覓遠襲後因縱賊殃民於雍正四年革職
安插江西

德勝關土驛丞王義明初招集高娜李珠等五百衆

歸附授土驛丞

洱西驛土驛丞張鑑為元時提舉率衆歸明獲元左

丞伯都督等又築外城累功授土驛丞

楚場土巡檢楊波日元右丞布哈延裔洪武中造金
沙渡舟及築城運鹽累勞克冠帶把事至僧壽有武
勇從征麓川有功授土巡檢

徐甸土巡檢李義明初招元右丞李些左丞賽音等
聽命授土巡檢

安南坡土巡檢李納麟明初招白崖頭目高天惠等
戶口五百歸附授土巡檢

雲南驛土驛丞袁娜明洪武中招元同知自羌等及
土民三百戶歸附復以饋糧有功授土驛丞

賓川州賓居土巡檢董保元時為順寧府經歷明洪武開滇以象馬來降授大理經歷至董祿降授巡檢金沙江土巡檢得力王石明初從攻烏撒及永昌功授阿幢橋巡檢職後調金沙江

雲龍州土知州段保明初率衆歸附從征普顏篤有功授世襲知州浴至段嘉龍為舍目段進忠所殺官誅進忠遂改設流官天啟中嘉龍子綵有剿寇功復給冠帶傳子德壽

師井土巡檢楊勝明初率衆來歸授土巡檢天啟中改屬雲龍

上五井土巡檢楊惠明初歸附從討鄧川楊娜授浪穹主簿後以麓川功世襲土巡檢萬厯中隸雲龍

順邊井土巡檢李良明初率衆歸附從鶴慶知府董賜入朝授土巡檢萬厯中改隸雲龍傳至鴻翼

十二關土巡檢李智明初歸義授職萬厯中改隸雲龍傳至國柱職除

漕澗土千總左納明初歸附授世襲
以上十四土官載舊志久除革

楚雄府

楚雄縣土縣丞

元末楊永康為縣丞傳楊益明初歸附授世職從征麓川及緬有功沿至

紹先傳弘道弘道傳宗儒宗儒傳春盛
春盛投誠仍授世職傳子毓秀毓秀死今子世勲襲

鎮南州土州同

元末段良為金齒路僉事明洪武十五年劾順授土州同沿至段欽傳承

祖承祖傳明柱明柱傳光先光先死無子弟光贊襲
本朝平滇光贊投誠仍授世職光贊死今子恒散襲

土州判

元末陳均祥為威楚路土官明初劾順宣力授土州判後再入覲賜誥命沿至國試傳景

勲景勲傳膳科膳科傳昌虞 本朝平滇昌虞投誠
仍授世職昌虞死子振世襲振世死無子查取世系
以國試次子大勲之孫典愚襲典愚死子繼虞痴聾
不能任事今以孫輔世襲

阿雄關土巡檢

明洪武開滇者伯隨征有功授土巡
檢沿至利仁傳壁峯壁峯傳祚祚傳

文傳光祖 本朝平滇光祖投誠仍授世職光祖
死今子宗盛襲

鎮南關土巡檢

明洪武初楊堂歸附征南有功授土
巡檢沿至世惠傳珏珏傳繼祖 本

朝平滇繼祖投誠仍授世職繼祖死子可喬襲可喬
死今子仕傑襲

定遠縣土主簿

元末定遠人李祿久以軍功委掌本
縣印務明初歸順有功仍授知縣傳

子直改授土主簿沿至李文傳國用國用傳玉玉傳
世卿 本朝平滇世卿投誠仍授世職世卿死子濬

襲濟死弟濟襲濟死今子德晟襲

廣通縣回澄關土巡檢

明洪武十七年楊保歸順隨征有功授土巡檢治至楊光

寵傳懋勲懋勲傳忠祚忠祚傳弟忠蓋本朝平滇忠蓋投誠仍授世職忠蓋死子琮襲琮死姪士龍襲士龍死今姪恒襲

沙矣舊土巡檢

明洪武十五年蘇成充黑井竈長解鹽入省授把總二十八年武定賊者

反劫課成率鄉兵斬之授土巡檢治至蘇什得傳起鸞起鸞傳鑑本朝平滇鑑投誠仍授世職子承宗

襲承宗死弟承祖襲承祖死今子顯仁襲

鎮南州英武關土巡檢張未明永樂中歸附有功授

世職傳至世廕世俊

沙橋驛土驛丞楊子均明初歸順有功授驛丞世襲

職傳至韜

廣通縣土主簿段璽明初同土官歸附以從征大理

功授主簿傳至佳蔭

琅井土巡捕李普政明初歸附授巡捕傳至李化

黑井土巡檢樊奇國土巡檢楊登高

以上六土官俱久裁革

姚安府

姚州土州同

元末高義為知州明初其子惠歸順授州同沿至應騏傳曷曷傳晶傳顯錫

輔本朝平滇顯錫投誠仍授世職顯錫無子姪輔襲死子啟宗襲啟宗死今弟宗亮襲

土同知高明壽本高泰祥裔世居姚州元末為姚安路總管明初子壽保降授同知世襲萬歷中高金宸

以征緬功晉秩四品金宸死子光裕襲光裕死子守藩襲守藩死子耀襲以疾避為僧子裔映襲本朝

平滇裔映投誠仍授世職裔映死子映厚襲映厚死
子厚德襲雍正三年以不法革職安置江南

永昌府

孟定土知府

舊名景麻元至順四年立孟定路軍民總管府領二甸隸大理金齒等處宣慰

司明洪武十五年改置孟定府正統間麓川叛知府
刀祿孟遠遁失其地有罕貫者從王驥南征擒賊首
色鷄色罕授世襲孟定府都督五傳至罕榮萬厯間
叅將鄧子龍南征至其地曰豈有土府而加以都督
之銜奏改頒知府印榮傳信信傳貴貴傳見明見明
傳宋宋傳珍本朝平滇珍投誠仍授世職珍死今
姪監猛襲其地有無量山喳哩江其風俗男帶竹帽
女衣文繡

灣甸州土知州

蠻名細賤自古不通中國元中統時內附屬鎮康路元末景法為萬戶歸

明授灣甸正長官景法子景宋入貢洪武十七年置
灣甸州授宋知州萬厯十一年景宗貞率弟宗材尊
罕虔入寇姚闕宗貞死於陣擒宗材斬之以宗貞子
景從幼降為州判後從討猛廷瑞有功復陞知州傳
子承恩承恩傳國泰國泰死子先哲幼叔文智護印
本朝平滇文智投誠授世職文智死姪先哲襲先
哲死今子榮名襲其地有孟通山枯柯河人皆雙種
以芭蕉實當果額徵差發銀五十兩

鎮康州土知州

舊名石賧元立鎮康路軍民總管府
明洪武十五年改鎮康府十七年改

為州正統中土官刀悶光以隨王驥征麓川功授土
知州隆慶間悶敬娶罕虔女因附虔歸緬萬厯十一
年官兵敗緬敬死其叔悶恩歸義授以州事恩死子
枳襲木邦思禮誘之歸緬不從令海慶取控尾據之
天啟二年木邦兵據喳哩江枳奔姚闕守備遣官兵
拒之木邦乃退枳死子達襲本朝平滇悶達投誠

仍授世職。閭達死，子珍襲。珍死，今子鼎襲。其地有烏龍山、黑龍塘、土田瘠薄，民性矯健，男子出婦人閉戶以待，其至當木邦之要路，為內地之藩籬。額徵差發銀一百兩。

直隸耿馬宣撫司

原係木邦村寨，萬厯間緬甸侵木邦土官罕盡忠奔永昌，有罕閭坎。

閭金從鄧子龍征緬，恢復木邦，給閭坎宣撫司印。每歲差發銀五十四兩，赴金騰道輸納。閭坎死，無子弟，閭金襲閭金死，子閭拏襲。本朝平滇，閭拏投誠，仍授世職。因金騰道裁差，發銀赴布政司輸納，不隸於府。閭拏死，子抒忠襲。抒忠死，子世藩襲。世藩死，今子國楷襲。與孟定府隔喳哩江，而居其地，有三尖山。昔罕度之黨罕老聚眾，負固於此，又有養馬山風俗，與孟艮同。

隴川宣撫司

舊名麓川，其地曰大布芒。曰：「朕頭附賽曰朕中，彈吉曰朕尾。」福祿培皆白夷所。

居元中統初多線爪內附至元十二年置麓川路金
齒等處宣撫司明洪武十七年歪悶歸附置麓川平
緬宣慰司宣德年與木邦仇殺因失官以孟養刀氏
代至正統二年思任因刀賓玉勢弱遂據麓川叛侵
孟定灣甸掠騰衝南甸取孟養地刀賓王奔永昌死
六年兵部尚書王驥進征大破之十一年改麓川為
隴川設宣撫司於隴把與南甸干崖合為三宣屏蔽
永騰以夷目恭項領之後任子思機思卜復叛項內
奔安插曲靖以其頭目多氏代之萬厯五年多士寧
為養子岳鳳所殺勾緬據其地十二年岳鳳既俘立
多思順加宣慰司職二十年緬人窺等練至其地思
順奔猛卯會官兵大戰於栗柴壩追逐之二十一年
巡撫陳用賓檄知府漆文昌築八關於其地三十八
年思順子安民叛巡撫周嘉謨平之以金牌畀其弟
安靖為宣撫本朝平滇安靖子紹寧投誠授宣撫
世職紹寧死子勝祖襲勝祖死子治國襲治國死今

于世臣襲其地有馬鞍山摩黎山羅木山俱極高峻夷人恃以為險又有湯泉從石鑄流出為河熱如沸湯俗與南甸同有城郭宮室其人皆樓居舊額徵差發銀一百七十兩

千崖宣撫司

舊名千賴睦元中統初內附至元中置鎮西路軍民總管府領二甸明洪武十

五年改鎮西府有希忠國隨征有功授千崖長官司改姓刀正統中刀怕率以麓川功陞宣撫司萬厯三十九年刀定邊又以平叛功加三品服明末為蓋達司刀思韜所殺本朝平滇定邊子建勲投誠仍授世職建勲死子秉忠襲秉忠死今子捷泰襲由騰越西南行二百里踰黃連關至其境其山曰雲晃在司南十五里上有瀑布流為雲晃河曰雲籠在司東二十五里曰白蓮在司北六十里中挺一峯土官居其麓下有白蓮池曰刺朋在司西百餘里其水曰安樂河源出騰衝經南甸迤邐治北折而西百五十里入

檳榔江境內甚熱四時皆蠶有白氎布白蓮花竹繩
大如兔而肥舊額徵差發銀五十兩

南甸宣撫司

舊名南宋在騰越南半個山下其山巔
北恒有霜雪南則炎瘴如蒸元至元二

十六年置南甸軍民總管府領二甸明洪武初刀貢
猛本姓龔江南上元人因隨師南征住南甸改姓刀
以招撫曩猛功授騰衝千戶永樂中其弟貢蠻入貢
改陞南甸土知州正統八年刀樂硬以麓川功陞宣
撫司傳至刀樂臨以平岳鳳功陞宣慰司轄部有羅
部司莊小隴川皆百夫長分地知事謝氏居曩宋悶
氏居盞西屬部直抵金沙江與孟養地犬牙相錯萬
厯二十一年巡撫陳用賓檄知府漆文昌建闕置堡
於司西北今不復存自刀樂臨襲後厯傳至樂啟樂
啟傳子樂保樂保傳兄呈祥本朝平滇呈祥投誠
授宣撫世職呈祥死子啟元襲啟元死今子思賜襲
其地有丙弄山在司東十里又東五里蠻千山土目

憑險阻居其上沙木籠山在司南百里上有關立木
為柵南牙山甚高延袤百餘里官道經之上有石梯
夷人據此為險其水曰小梁河源出騰衝赤土山麓
西南流經南牙山下曰南牙江至干崖為安樂河而
合於太盈江有孟乃河在司東南南七十里即騰越龍
川江之源俗與木邦同婚娶用穀茶二長筒雞卵五
七籠為聘客至以穀茶供奉手拈而食之產紅藤孔
雀叫雞舊額徵差發銀一百兩今納差發銀十一兩
遮放副宣撫司

隴川之貳也明正統元年多懷們從
征猛卯夷有功授遮放副宣撫司孫

思譚於萬厯中從征蠻莫緬瓦隴川累功益以隴川
地領隴川多俺為同知居猛卯多茶為副使居遮放
沿至多爾忠本朝平滇爾忠投誠仍授世職爾忠
死子賢輔襲賢輔死子世祿襲世祿死今子多量襲
蓋達副宣撫司

干崖之貳也明正統四年怕便以從
征麓川功授蓋達宣撫司賜名刀思

忠傳至思官以木邦罕氏勾緬破城為緬所獲兄思權襲以平猛廷瑞功賜繡衣傳至思韜本朝平滇思韜投誠授副宣撫世職思韜死子思鉉襲思鉉死子思琳襲思琳死今子思弼襲

潞江安撫司

蠻名怒江甸元隸柔遠路明洪武十五年曩璧法內附授長官司職永樂九年

陞安撫司賜姓線氏傳九世至線有功本朝平滇有功投誠仍授世職有功死姪崇毅襲崇毅死子國勳襲國勳死子于陞襲于陞死今子朗襲額徵差發銀八十兩

芒市安撫司

蠻名怒謀又曰大枯賧小枯賧即唐書所謂芒施蠻也元中統初內附至元十

三年立芒施路軍民總管府領二甸明洪武十五年置芒施府正統九年放定正隨征緬有功授芒市長官司萬厯初放福與岳鳳聯姻十一年導緬寇松坡事覺擒福正法立其舍目放緯領司事轄於隴把緯

傳珀珀傳廷臣以入貢加授安撫司職傳子國璋國璋傳愛衆本朝平滇愛衆投誠仍授安撫世職愛衆死子彌高襲彌高死子天球襲天球死今子仁襲其地川原曠邈人稍脆弱男子以石榴皮染齒使黑婦人分髮直額為一髻垂於後跣足衣皮西南有青石山又有永貢幹猛二山皆高廣陡絕夷長所居其水曰芒市河麓川江皆流至緬地合大盈江曰大車江自騰越流至司境匯於緬中蒲甘城地產香橙橄欖芋蔗額徵差發銀七十兩

猛卯安撫司

明萬厯初有猛密頭目思化敗緬於送連緬逐之入居蠻莫朝廷嘉之授蠻莫

宣撫司思化死子正嗣緬潛師深入挾取正首而去後又立正之弟忠改姓衍授安撫司職數被緬侵勢不能支因安插於猛卯卒為緬所擄殺舍目瓏襲瓏傳瑾瑾傳珍珍傳瑄本朝平滇瑄投誠授猛卯安

撫司世職瑄死子玟襲玟死今子志襲

孟連長官司

由姚關東南行十九程至其地又七程至孟艮其東為車里西為木邦蠻名哈

瓦慄悍好劫自古不通中國明正統中平麓川始來歸萬厯間其長刀派真有叔刀派漢娶於車里因以車里殺派真而奪其官十二年率車里來貢十九年又勸緬入貢派漢死弟派金嗣天啟二年阿瓦破之會洞吾代阿瓦退其差發額銀四十八兩本朝雍正八年總督鄂爾泰奏據土司刀派夷呈稱仰

賴

皇上洪福安享太平年年豐稔情願自雍正七年為始每年納募迺厰課銀六百兩以充兵餉奉

旨孟連地處極邊總督鄂爾泰化導有方俾各抒誠効順貢納厰課孟連土司厰課每年六百兩為數太多著減半收銀三百兩以昭朕柔遠至意其雍正八年

已解司銀六百兩着將一半即准作辛亥年正課
永平縣縣丞元時有馬氏世為土副使明初馬鎖飛
歸順授縣丞沿至馬一騮一駿一騷傳渥本朝
平滇騷投誠仍授世職傳至燕以父子同惡相濟於
雍正五年革職
施甸長官司莽氏

鳳溪長官司莽氏把事張氏
甸頭土巡檢司莽氏

水眼土巡檢司莽氏

打牛坪土驛丞明正統中楊霖從征麓川授世職
騰越州龍川江驛土驛丞王氏百夫長刀氏
永平驛土驛丞李氏

打牛坪土巡檢蒙氏
右甸守禦千戶所蔣氏土官二一正千戶一副千戶

以上十二土官舊志開載今久革除
保山縣有十五宣二十八寨併大楚蒲人峨昌諸夷

其蠻長或以百夫長稱或以千夫長稱或以實授百戶稱皆奉命令復徭役但性勇悍不能驟格又為市獮所誘漸習奸偽耳考其見於尺籍者敢頂上下喧罕氏早納喧線氏石冊寨苑甸東山寨下騰場寨金齒東山寨甸頭寨保場甸烏邑寨七莽氏皆副千夫長也古里喧早氏盪習喧孟氏蠻雲喧早氏西牙喧線氏渡艮邑寨木瓜郎寨阿思郎寨南窩寨周冊寨信邑寨瓦窰寨七莽氏北衝寨羅明寨羅古寨羅板寨四早氏潞江寨左氏皆百夫長也蠻岡喧篋氏錦邑寨老姚寨交邑寨牛旺寨山邑寨五莽氏皆實授百戶也蒲縹寨莽氏火頭也外此以喧稱者尚有崩夏喧賓氏蠻雷喧早氏空廣喧罕氏蠻寬喧幸氏刺倫喧早氏蠻養上喧蠻養下喧刀氏以寨稱者尚有枯柯寨明邑寨茶山寨乾海子寨其十五喧皆存惟二十八寨中有裁革者有歸併者有更名者蠻長或以土舍稱或以總旗鄉導稱不能悉記

附錄

老撾軍民宣慰使司其夷佩雕爪為飾俗呼撾家即古越裳氏自周以後不通中國明永樂三年以方物入貢始置軍民宣慰使司嘉靖間緬人破其東之攏掌亦名南掌蓋老撾屬部地之最荒遠者本朝雍正七年南掌國遣頭目叭猛花等奉表進貢賞賚遣還其地東至水尾界南至交趾界西至八百界北至車里界自司西北六十八程至省城其人服食類木邦但性獷悍身及眉目皆黥繡花其長一代止存一子承襲絕不育女居高樓見人不下部屬見之所至有等限使客亦然其國人稱至尊必曰天旺其產海貝犀牛乳香訶子

木邦軍民宣慰使司舊名孟都一名孟邦相傳蜀漢時木鹿王苗裔元至元中立木邦軍民總管府領三甸明初內附改木邦府後改木邦軍民宣慰使司徵差發銀一千四百兩明永樂間罕賓從征緬正統中

罕蓋從征麓川有功益其地在六慰中分土最廣萬
厯中緬誘執罕拔襲取木邦拔子盡忠奔內地緬追
至姚關焚順寧而去十一年官兵破緬立盡忠子欽
欽死其叔罕溢約邏羅攻緬緬恨之遂以三十萬衆
圍其城請救於雲南援兵不至城陷緬以猛密司禮
領之司禮憑恃瓦夷差其目海慶據控尾求猛弄寨
又與召依坎換象干戈相尋焉其地東為孟定南為
猛密西為緬甸北為芒市自姚關渡喳哩江十二日
至其地夷類數種男子皆衣白文身髡髮摘鬚鬚修
眉睫婦人則白衣桶裙耳帶金圈手帶象環其產饗
錫胡椒

八百大甸軍民宣慰使司夷名景邁世傳其長有妻
八百各領一寨因名八百媳婦國元初征之不下後
招附置八百等處宣慰司明洪武中來貢乃立八百
大甸軍民宣慰使司其地東至車里界南至波勒蠻
界西至大古刺界北至孟艮府界自姚關東南行五

十程至其地有南格刺山下有河南屬八百北屬車里平川數千里轄部廣遠其產巨象及安息白檀諸香民皆焚夷刺花樣於眉目間見客則把手為禮好佛惡殺一村一寺一寺一塔塔以萬計敵人侵之不得已出師得其仇而罷名慈悲國嘉靖間其酋刀氏為緬所逼避居景線名小八百緬以其弟莽應龍居景邁城為一臂萬厯十五年刀氏請兵恢復未許後竟為緬有

孟養軍民宣慰使司俗名迤西有香柏城與蠻莫同襟金沙江孟養居其上流南至底馬撒江連西洋北極吐蕃西通天竺東南鄰於緬山曰鬼窟號稱險要夷人據為硬寨小有釁則治兵相攻其土下濕夜寒濱江為竹樓以居一日數浴元至元中始置雲遠路軍民總管府明洪武十五年改雲遠府十七年改孟養軍民宣慰使司歲輸差發銀七百五十兩正統間宣慰刀賓王勢弱思任敗之於麓川奔永昌死後為

思洪所據自上狀願當差發靖遠伯王驥許之磬石金沙江上曰石爛江枯方許渡雖授金牌終無印信凡通文書但稱金沙江娜婢而已成化中思仁子祿以祖母祿帶及諸珍物賂鎮守太監錢能能召見飲食之思祿稍稍縱橫弘治初重給土酋金牌信符偶忘孟養久廢止按舊籍頒給思祿遂謂天朝復其官職以符牌號召諸夷略取旁邑自廣會猛密叛木邦叅政毛科檄思祿兵攻孟密思祿以羸兵數千應科為猛密所敗思祿大怒遂越界過金沙江攻猛密取蠻莫等十七寨科又勸巡撫金獻民請兵大舉征思祿上不許會思祿亦遣人奏言為鄰惡誣誤願入蠻莫十七寨贖罪得比米魯仍乞以一子為宣慰如故朝議遲疑不決思祿遂據孟養自立萬厯八年緬擒宣慰思箇幽死據其地舍目奔永昌十二年思義來歸十三年思威敗緬於密堵殺緬目多曩長十七年思遠貢象方物賞以金幣授宣慰十八年緬報密堵

之役復攻孟養遠率其子昏奔蓋西緬以頭目曩爰據之其後思轟送款於朝與蠻莫思正結為唇齒共據長江以抗緬三十年緬追思正轟率兵象倍道馳救之至則正已被殺三十二年緬復襲迤西轟走死緬以頭目思華據之及華死妻怕氏領其地緬中他目更番戍守連年發其兵從征數疆悍不可縻云轟之夷目曰放思祖有千戶人不敢歸安插千崖緬甸軍民宣慰使司蠻名阿瓦元世祖至元中由吐蕃三討之後於蒲甘緬王城置邪牙等處宣慰使司明洪武二十六年緬酋南速來朝二十七年始置緬甸宣慰司以其長普浪刺為宣慰永樂元年緬甸那羅塔遣使來貢三年四月又來貢始給金牌信符命中官楊瑄往諭之七月那羅塔謝恩入貢四年緬甸與孟養刀木旦仇殺勅行人張列持節往諭那羅塔遣使乞宥許之十五年建緬甸館宣德五年麓川思仁及緬甸莽得喇各遣使上言木邦罕門占據其地

命黔國公沐晟內官雲仙諭之退地正統初麓川思
仁遜緬許緬以孟養之地緬會卜浪刺獻思仁並其
妻子弘治元年緬甸來貢且言交趾侵其地遣編修
劉戩諭交趾罷兵嘉靖初孟養思倫糾木邦罕烈擊
緬破之殺其宣慰莽紀歲莽人赴闕訴命永昌知府
嚴時泰等往勘思倫夜縱夷兵鼓譟焚驛舍時泰等
僅以身免時值安鳳之亂不遑問外事也莽紀歲有
子生於雪中其體有光滿室因名瑞體紀歲為孟養
所殺瑞體奔洞吾母家洞吾會養為已子及長與養
母通洞吾會死遂據有其地以計滅擺古東破纜掌
西取土亞又攻景邁服車里因思箇誘罕拔號召三
宣為西南雄長及瑞體死應裏繼之屢為邊患侵掠
諸土司事詳師旅考其地東至八百界南至海西至
孟養界北至猛密界自司東北三十八程至雲南省
城其山曰小豹江曰金沙江澗水惡緬人據以為險
其俗柔詐慄悍居屋廬陸乘象馬水濟舟筏其文字

進上者用金葉寫之次用紙次用檳榔葉謂之緬書
男子善浮水縮髻頂前用青白布纏之婦人縮髻頂
後不施脂粉事佛敬僧有大事則抱佛說誓或詣僧
誓之然後決其產象犀馬椰子白氎布兜羅錦樹類
椶高五六丈結實如掌土人以麪納罐中以索懸罐
於實下割實取汁流於罐以為酒名樹頭酒或取汁
熬為白糖其葉即貝葉用寫緬書有石油自石縫流
出惡臭而黑可塗毒瘡古蹟有江頭城至騰衝十五
日太公城在江頭城南十日馬來城在太公城南八
日安正國城在馬來城南五日蒲甘緬王城在安正
國城西南五日所謂緬中五城也

孟艮府蠻名孟措在姚關東南二千里其東為車里
界南八百界西木邦界北孟連界自古不通中國明
永樂四年來歸置孟艮府編差發黃金十六兩其地
東接車里南接八百西接木邦北接孟連後為木邦
兼併嘉靖間附於緬與景邁莽應龍相表裏然亦未

敢背也其長名怕詔居層樓有妻數百晡時乘象出浴於江浴畢蜀服羅拜其長解約臂金鐲授者當夕其官師曰司祿刀猛卒伍曰豈些出入以象名曰象馬兵革犀利男女俱警捷沃野千里最稱殷富地多虎農者於樹杪結草樓以護禾衣皆套頸鵝毛為褥雲南知府趙渾曾以撫夷入其地其長偃蹇無禮後無至者

猛密宣撫司有磚城無戍樓產花果瓜蔬與中國同南牙山峙其北摩勒金沙二水環焉山高田少米穀最貴又多地羊鬼為行人崇北距騰衝一千里一由木邦錫波入一由孟郊至猛廣入一由邦抗魯祖渡莫勒江過南牙而入一由蠻莫入明永樂間木邦宣慰罕賓以征八百緬甸功授以猛密十三處其所部有寶井為木邦利府陶孟思歪領之陶孟者猶華言頭目也木邦宣慰司罕撲以其女曩罕弄妻思歪罕撲死其孫罕挖立嗜酒好殺曩罕弄遂以猛密叛木

邦成化初南寧伯毛勝守雲南猛密寶石許得自貢
不闕木邦太監錢能尤利其珍賂曩罕弄遂怙勢無
忌畧地自廣十六年太監王舉索猛密寶石不得因
疏猛密木邦罪請征之曩罕弄大懼會有江西人周
興五者通猛密因為曩罕弄計遣人資金寶賂政府
求釋罪且請授官政府許之遂投意都御史陳宗注
撫之宗至猛密曩罕弄恃有內援益倨傲不出迓宗
且要宗過南牙山就見坐講宗不得已從之曩罕弄
乃曰我猛密之於木邦猶大象之孕小象也今小象
長成軀倍大象矣寧能復入大象腹中乎宗曰然遂
以所侵木邦地畧之為設安撫司以歪子孫世其職
木邦人詣宗訴辨宗輒答止之狀聞政府大喜遂以
宗撫雲南尋遷刑部尚書曩罕弄既立盡奪木邦地
罕它奔猛正由是孟養諸酋大不平遣大陶孟倫索
提兵衛罕它聲言必滅猛密會弘治改元副使林俊
稍割猛密地還木邦曩罕弄懼不敢逆命遂與木邦

並立為世仇矣嘉靖初思奔思溷爭立緬人殺奔立
溷溷遂以地附萬厯十二年溷改名思忠率思化思
服齎偽印來歸遂陞為宣撫忠死十六年緬攻猛密
忠母罕烘弱不能支率其孫思禮從子思仁奔猛廣
而猛密失十八年緬復攻猛廣罕烘思禮奔隴川思
仁丙測奔工回而猛廣又失二十年思仁叛投緬緬
以思仁據其地

蠻莫宣撫司地在騰越西蠻哈山下山如象鼻行者
累足自布嶺三日至其地田土饒衍風俗與隴川猛
密同東有等練山環以那莫江直走金沙當緬人水
陸之衝為隴川右臂舊為猛密分地後酋長稍強擅
而有之明萬厯初以思順為宣撫時思順陷在緬猛
密頭目思化入據其地

茶山長官司在騰越州西北去州五日程距高黎貢
山極高而寒五穀不蔭其人強悍喜鬪舊屬孟養明
永樂三年孟養糾上江刀孟永叛夷目早章不附五

年請命賜印授章為茶山長官司十五年章舉頭目
早甕為副傳至早玉授正長官其北與麗江野人接
境明末副長官早大宸所部為野人殺掠無孑遺奔
入內地惟正長官早鄧所部尚存其地南至南甸西
至里麻

里麻長官司司其東接茶山西北皆野人有整冬溫冬
二山部夷皆蛾昌蠻舊屬孟養明永樂三年孟養土
目早信有拒賊功六年頒印世授長官萬厯中刀思
慶襲早奔副之沿至思虎為野人所掠盡棄其地與
把事李廷高奔赤石坪副長官堪信亦被殺無噍類
焉

鉅兀長官司蠻名也兀自古不通中國明宣德七年
始歸附東至元江界南至車里界西至威遠州北至
臨安思陀甸自司北十六程至雲南省城民皆倭泥
類蒲蠻男子綰髻於頂白布纏頭婦人白哲盤頭露
頂以花布為套頭見人無拜禮額徵差發銀四十兩

以上各土司俱舊志所載 本朝未經授職

鶴慶府

土通判

元時高惠直為總管子賜為土千戶傳至高海歸明以征佛光寨有功授千夫長沿至高

玉贈明威將軍子藩臣以功授指揮僉事傳至應星本朝平滇應星投誠仍授世職應星死子彥襲康熙二十二年改土通判彥死今孫滋襲

在城驛土驛丞

元末田宗為府判明洪武十五年歸順以從征普顏篤佛光寨有功授土

驛丞沿至得惠傳泰年泰年傳珍 本朝平滇珍投誠仍授世職珍死子世祿襲世祿死今子生蕙襲

觀音山土驛丞

明洪武十六年郭生歸附從征佛光寨有功授驛丞沿至郭維藩傳陞

傳朝鎮朝鎮傳朝柱 本朝平滇朝柱投誠授世職
朝柱死朝鎮子鼎襲鼎死子紹儀襲紹儀死今子斌
襲

觀音山土巡檢

明初王友德歸順以名同穎國公去
德字擒獲大松坪賊楊奴等授土巡

檢沿至王之和傳欽欽傳印兆 本朝平滇印兆投
誠仍授世職印兆死今子天受襲

土知府董賜原係安寧土知州明洪武開滇俾署鶴
慶府傳子仲以同知授知府沿至高倫正統間以淫
暴革除

土知事明初有董信以征普顏篤有功授知事傳至
董祿弘治六年革除正德七年祿之孫從賢仍襲前
職傳至堂蔭復革除

劍川州土州判明洪武初趙保歸順以功授土千戶
沿至趙震 本朝平滇震投誠授世職康熙二十二

年改州判震死子元麗襲雍正九年以遺失號紙革職

順寧府

雲州大猛麻土巡檢

明洪武初有土舍奉健者大侯州土知州之分派也四傳至恭

於萬厯二十五年以征大侯奉學有功尋改大侯為雲州授恭土巡檢恭傳詔詔傳朝宣朝宣傳新命本朝平滇新命投誠仍授世職新命死今子召寶襲

猛緬長官司

其先奉布明洪武初開闢猛緬土地招集民夷世為土舍四傳至奉厯於萬厯

中以從討猛麻奉供仇殺有功授長官司奉厯死子墮肆虐為頭目奉墮所殺弟奉鼎奉星爭立鼎奔孟連星恃耿馬而木邦猛郊從中助兵巡撫周嘉謨檄金騰道為之解紛令鼎星分食其地以其母陶氏護

印鼎傳姪寶以沙定洲之叛赴援加宣撫司子國珍襲本朝平滇國珍投誠仍授宣撫司職國珍死子

聖襲改為長官司聖死今子廷徵襲

土知府元時蒲蠻長孟佑之後內附賜姓猛氏授土知府至猛闕明初歸附仍授世職六傳至猛廷瑞以助奉學構兵革職改設流官

大侯州土知州奉氏其先奉維從靖遠伯王驥建功世為大侯州知州明萬厯中奉赦與弟奉學爭持不睦學恃女夫廷瑞據雲夢頻年構兵赦憤激赴省繳印而還陳用賓馳檄解諭不聽發兵討平之改大侯為雲州設流官議以奉赦憤兵繳印罪非叛比准其子國佐為土州判傳子昌應本朝開滇以不換號

紙停襲

猛撒土巡檢司罕存明萬厯間與奉政同授今絕

阿林寨土巡檢楊氏莽水寨土巡檢莽氏右甸守禦所千戶蔣氏段氏皆久裁

永北府

永寧府土知府

明洪武十四年土官卜都各吉以所轄部民來歸授永寧州土知州卜都

死子各吉八合嗣永樂三年令香羅革甸瓦魯之刺次和四部番夷火頭板必他布郎吉分阿只苴等入朝嘉之陞永寧為府授各吉八合中順大夫賜銀金花帶鐫四字曰克篤忠誠更以香羅革甸瓦魯之刺次和為長官司投板必他等副長官後八合老病子卜撒襲為四川鹽井土官喇馬非所侵父子俱被殺卜撒妻訴於鎮守逮喇馬赴京道死因疆理其地以卜撒弟南八嗣其職正統中鹽井諸蠻侵據之土官不能治乃請設流官同知經歷各一治署於浪滄衛握郡符遙治之沿至銓死子鎮麒麟襲本朝平滇鎮麒麟投誠仍授世職傳子阿庭錕庭錕死子錦輝襲錦輝死子錫遠襲錫遠死弟錦先襲錦先死今子有威

襲康熙三十八年改屬永北府

北勝州土知州

元末高斌祥為北勝土知府累官雲南行省左丞明洪武中改府為州二

十二年斌祥子高澤以軍功授知州澤孫昶以征麓川功加府同知仍管州事昶曾孫崙以征安鳳功進階朝列大夫崙會孫世懋以征順大功授四品服世懋死弟世昌襲世昌死子斗光襲本朝平滇斗光投誠仍授同知世職子贊甌襲三十八年改州為府設流官贊甌死子勲改授北勝州土知州勲死今孫耀龍襲

土州同

元末章吉特穆爾為北勝土知府明克大理以部民及順州民降納所握印及麗江宣撫

司印三珠虎符西平侯沐英令其子觀音奴從軍因兵逃伍乃降為州同與高氏翼居州治左右沿至成

文傳永永傳柱國柱國傳興國 本朝平滇興國投誠仍授世職興國死無子庶兄佐國襲佐國死今子法祖襲

順州土州同

元時子日為土知州至子興歸明授州同沿至如壁傳一龍一龍傳天錫以軍

功加銜遊擊進階知州傳子祿祥 本朝平滇祿祥投誠仍授州同世職祿祥死子大賢襲大賢死子玠襲玠死今子肱襲
蒞蒞州土知州阿的明初歸附從征有功授土知州屬浪滄衛久裁革

麗江府

土通判

其先麥宗西域人宋理宗末始入麗江通路方語土人推為酋長子阿良元時為麗江路

軍民總管傳至木得明洪武初入貢歸附後以克石門寨功授土知府賜姓木又從吉安侯征巨津捕阿奴聰於吐蕃斬偽元帥朱保及沐西平征景東定邊咸在行間得死子初襲值白交山及偽平章賈哈喇麓川思任之亂咸有戰功賜金牌誥命改麗江軍民府令世居西郵捍吐蕃每有征調但輸兵餉而兵不出以重邊守沿十三世至木增代有封贈錫予增在任值北勝蠻亂以兵擒首逆高蘭又值遠左軍興輸餉二萬於戶部天啟二年陳言十事下部議可嘉其忠誠加叅政晉大僕卿賜璽書榮其先世增死子懿襲本朝平滇懿投誠仍給土府印懿死子靖襲靖死無嗣弟櫟襲櫟死子垚襲垚傳子興興死無子弟鍾襲以土人控告於雍正元年改為通判鍾死今子德襲

土照唐木目本府人明初從征麓川有功授本府照唐沿至木苴刺未襲而死世絕

通安州土州同高賜元時為義兵萬戶明兵平南賜從征佛光寨招諭未附者以軍儲餉師授州同後革除

蘭州土知州羅克元時為萬戶明洪武中率衆來歸以軍功授土知州其後有羅牙者從木初征刀於孟亦著戰功後革除

蒙化府

土知府

元時左青羅為順寧府同知傳至禾為九部火頭順寧司通事明洪武中歸附仍其職後

官兵征高大惠等遣禾招諭降之因授蒙化州判永樂中陞知州子左伽正統中納米陞同知後從征麓川累功陞大理府土知府仍掌州事尋陞州為府遂實授知府沿至近嵩傳子星海本朝平滇星海子世瑞投誠仍授世職世瑞死子嘉謨襲嘉謨死今子麟哥襲

舊定邊縣土縣丞

明洪武初蠻長刀思良叛阿魯捐助糧餉奮勇敢謀擒獲思良授土

縣丞沿至阿天明傳廷相廷相傳應鯤應鯤傳志經

本朝平滇志經投誠仍授世職志經死子世忠襲

世忠死弟世勲襲世勲死今子抱琛襲

漾濞驛土驛丞尹義明初從征佛光寨授驛丞久革

除

景東府

土知府

元時阿只魯為遠幹府開南州管理統威遠州及紫板母龍猛統三甸明初兵至楚雄只

魯子俄陶遣通事姜固宗阿袁等納款獻印并鎧仗馬匹乃改遠幹開南為景東府命陶知府事賜姓陶後因緬目思可伐來侵戰敗奔白崖調神策衛鎮其地是為景東衛尋從大兵剿寇有功頒賜金帶鎮誠

心報國四字及銀幣甚厚陶死子幹襲幹傳瓚偕衛兵攻麓川者張羽牙殺奉撒等晉階大中大夫沿及陶金攻鐵索米魯那鑑安銓鳳繼祖烏撒諸役皆以兵從金傳子淞淞傳子明卿明卿傳子璽璽傳子爾鑑爾鑑死無子以淞孫空襲本朝平滇空投誠仍授世職空死孫港襲港死無子今空次子大鑑襲

土知事

明洪武中把事姜固宗齋本府金牌印信降尋以象馬入貢又從攻磬嘉功得冠帶子嵩

於宣德中陞猛緬正長官後改本府知事沿至可久傳述望述望傳啟賓本朝平滇啟賓投誠仍授世職啟賓死無子叔顯望襲顯望死今子啟武襲

三岔河土巡檢

明時楊勝為把事宣德中以饋餉攻麓川者張羽牙功得冠帶弘治中於

三岔河哨設巡檢司以當賊寇之衝授勝子祥土巡檢後以一碗水九窰坡二哨多寇并令鈴之沿至國

翰傳子弘緒弘緒傳弟弘仁 本朝平滇弘仁投誠
仍授世職弘仁死子承文襲承文死今子可昌襲

保甸土巡檢

明宣德中陶暹為頭目貢象入京授土
巡檢後從征馬龍他郎甸者張羽牙等

寨皆有功陞縣丞管巡檢事傳子華華死曾孫曜襲
沿至承宣 本朝平滇承宣投誠仍授世職宣死子
增襲增死子舜舉襲舜舉死今子瑜襲

板橋土驛丞

明初阿賽為俄羅舖村長以諳夷語迎
送得賓旅心授土驛丞後有功加巡檢

銜傳子阿哀哀傳子徐徐傳弟漢賜姓雲漢死弟滄
孫必高襲必高死子騰襲騰死子聯極襲 本朝平
滇聯極投誠仍授世職聯極死子振宗襲振宗死今
子雲仍襲

種人附

白人

古白國之支流也舊謠楚為白遂稱為一類其實不相通雲南諸郡皆有之習俗與華人不甚

遠又謂之

民家子

爨蠻

爨氏事詳雜紀唐書自曲州靖州西南昆州曲

自彌鹿升麻二州南至步頭謂之東爨烏蠻以烏白為號無姓氏其稱爨者從主姓耳漢初有白國王其夷為白人後有爨王則為爨人猶廣南夷號為儂人之類爨蠻之名相沿最久其初種類甚多有號廬鹿蠻者今謠為羅羅凡兩述之內依山谷險阻者皆是名號差殊言語嗜好亦因之而異大畧寡則刀耕火種衆則聚而為盜男子椎髻摘去髭鬚左右佩雙刀喜鬪輕死婦人披髮衣卑賤者飾錦繡賤者披羊皮耳穿大環剪髮齊眉裙不掩膝以臘月為春節豎長竿設橫木左右各坐一人以互落為戲病無醫藥用

夷巫禳之巫號大覲幡或曰拜禡或曰白馬取雛雞
雄者生剗取兩髀束之細剖其皮骨有細竅刺以竹
簽相多寡向背順逆之形以占吉凶或取山間草齊
束而拈之略如著法有夷經一皆鑿字狀類蝌蚪精
者能知天象斷陰晴民間皆祭天為臺三塔以禱其
部長正妻曰耐德德非所生不得繼父職若耐德無子
或有子早夭始及庶出者無嗣則立其妻女死以豹
皮裹屍而焚葬其骨於山非骨肉莫知其處多養死
士名曰苴可厚贍之每兵出則苴可為前鋒軍無行
伍紀律戰則躡身漸進三四步乃揮標躍起人挾三
標發其二必中二人其一則以擊刺不發也又有勁
弩毒矢飲血即死以射禽獸去其射中之肉而食之
部夷稱部長曰撒頗華言主人也夷性慙而戀主諸
酋長果於殺戮每殺人只付二卒攜持至野外掘一
坑集其親知泣別痛飲徹夜昧爽乃斬其頭推坑中
復命更使二卒勘之乃許其家收葬雖素暱者欲殺

即殺之出令勿敢丐者其家人亦莫敢怨慈用法嚴
誅求無厭每蠻長有慶事令頭目入村寨計丁而派
之遊行所至闔寨為供帳無少長皆出羅拜馬前鄰
寨在數十里內者皆以雞黍餽無以應誅求往往潛
出他郡劫掠所得頭目私分之官府檄下督
責則縛數人應命其現在種類附列於後

白羅羅

男女兩截衣裹頭跣足婦人耳帶銅環被衣
如袈裟以革帶繫腰喪無棺縛以火麻裹氈

昇於竹椅前導七人擐甲胄執鎗弩四方射名禁惡
止殺焚之於山既焚鳴金執旗招其魂以竹簽裹絮
少許置小篾籠懸生者牀間祭以丑月廿三日插山
榛三百枝於門列篾籠籠地上割燒豚每籠各獻少許
侑以酒食誦夷經羅拜為敬婚姻惟其種類以牛馬
為聘及期聚衆誼於女家奪其女而歸性寇情淫酒
信鬼畜蠱以手量裙邊投麥於水驗其浮沉以當占
卜在雲南澂江臨安永昌者漸習王化同於編氓其

在蒙自定邊尚稱頑梗在曲靖者於夷為賤種在江
川大理姚安皆稱撒馬都在楚雄為酒摩在永昌為

撒馬柴大抵

寡弱易治

黑羅羅

男子挽髮以布帶束之耳帶圈墜一雙披氍
佩刀時刻不釋婦人頭蒙方尺青布以紅綠

珠雜海貝碑礫為飾下著桶裙手帶象牙圈跣足在
夷為貴種凡土官營長皆其類也土官服雖革不脫
夷習土官婦纏頭線繒耳帶金銀大圈服兩截雜色
錦綺以青緞為套頭衣曳地尺許皆披黑羊皮飾以
金銀鈴索各營長婦皆細衣短氍青布套頭其在曲
靖者居深山雖高岡磽隴亦刀耕之種甜苦二莛自
贍善畜馬牧養蕃息器皿用竹筐木盤交易稱貸無
書契刻木析之各藏其半市以丑戌日葬貴者裹以
臯比賤者以羊皮焚諸野而棄其灰在路南者能為
乳酪雜樵蘇鬻於市腥穢侏儻若鹿豕然在安寧祿

豐者多負鹽於途在南安者以草為衣加於氍毹大都性多驚悍好攻掠而武定菽甸尤為亮頑鶴慶四十八村又號海西子亦其種多暴鐵索箐賓川州赤石崖螳螂古底舊稱淵藪自萬厯初芟蕩以來至今帖寧

撒彌羅羅

男挽髮如髻長衣短視婦短衫短裳滇池上諸州邑皆有之拙於治生不敢為盜賊

居山者耕瘠土販薪於市住水者舉家捕魚僅能自給

妙羅羅

皆土蠻官舍之裔或稱火頭或稱營長或稱官娜與黑白諸種迥異耳帶圈環常服用梭

羅布婦女衣胷背粧花前不掩脛後長曳地衣邊彎曲如旗尾無襟帶上作井口自頭籠罩而下桶裙細摺在阿迷者為諸種所敬憚其喪則合寨釀金為助在蒙化麗江鶴慶騰越楚雄姚安平彝新興永北王

弄山者不著其種類止曰獬獬所居茅舍中堂作火
爐父子婦姑圍爐而臥懼箠撻而不畏死祭以羊豕
捶死不殺在姚安者性狡悍好為盜賊在新興者居
昌明里力田為生在騰越者專資射獵永北又有號
獬獬者與四川建昌諸獬同類純服氍毹男女皆跣
足每踏歌為樂則著皮屨男吹蘆笙婦衣緋衣跳舞
而歌各有其節又稱獬落蠻男鵲帽襍積衣婦三尖
冠以採樵耕藝為事在新平者又稱白腳獬獬以白
布束其脛故名

阿者獬獬

衣服大略與黑獬同婚喪如白獬但耳環
獨大在東偏則江川諸邑有之西則賓川

有之通海者婚以牛為聘壻親
負女而歸耕山捕獵性好遷徙

乾獬獬

婚嫁尚侈諸種人所不及喪以牛皮裹屍束
錦而衣之以薪每食插筯飯中仰天而祝以

為報本好勇喜鬪殺人償之以財有讐怨雖父子兄弟推刃不顧多不通華言食貨貴鹽蒜

魯屋獾獾

服飾類黑獾別為一種特矛皆性尤獗獗好馳馬縱獵獨臨安魯郭村有之

撒完獾獾

居蒙自縣明月諸村在黑白二種之外勤於耕作捕蟲豸及鼠而食

海獾獾

尋甸有之亦名壩獾獾以其居平川種水田而得名也土人以平原可墾為田者呼為海

或呼壩故名與漢人相雜而居居處飲食衣服悉如漢人惟與其同類仍作夷語居家儉樸情性和純且知讀書

阿蜴獾獾

師宗有之樹皮為屋身披羊皮種植穀菽野麻不知尊卑長幼

葛獾獾

彌勒有之性獷悍以死為勇好獵亦帶耳環骨簪俗同黑獾但男子着麻衣婦人袍裙稍

短

羅婆

一稱羅武俗又稱羅午本武定種古以名郡今楚雄姚安永北羅次皆有之男子髻束高頂戴

笠披氍毹衣火草布其草得於山中緝而織之粗惡而堅綴或市之省城為囊橐以盛米麥婦女辮髮兩絡垂肩上雜以碑礫環珞方領黑衣長裾跣足居山林高阜牧養為業有屋無牀榻以松葉藉地而臥婚姻喜慶之事結一松棚為宴葬用火化腰刀長鎗行坐不釋嗜酒好鬪狡猾難治

摩察

黑獼猴之別類在大理蒙化者執木弓藥矢遇鳥獸射之無不獲所逢必劫遇彊必拒在武定

者一曰木察
習稍柔善

𤝵夷

一名擺夷又稱百夷蓋聲近而譌也性耐暑熱居多卑濕棘下故從棘從人滇之西南曠遠多

濕楚夷宅之種類數十風俗稍別名號亦殊其俗稱
宣慰曰昭華言主人也其官屬有叻孟昭錄昭網遞
相臣屬叻孟總統政事兼領軍民多者數十萬少者
則數萬昭錄亦萬餘人賞罰皆任其意昭網千人遞
減至十人又有昭錄調遣統數千人以行其近侍名
立者亦領數百戶皆聽其使食其賦取用無制節上
下僭奢微名薄職輒繫釵花金銀寶帶官民皆冠簪
葉累金玉珠寶為高頂上懸小金鈴遍插翠花翎毛
後垂紅纓貴者衣紵絲綾錦以金花金鈿飾之以坐
象為貴象首十數銀鏡為絡銀鈴銀釘為緣象鞍三
面以鐵為欄藉重茵懸銅鈴鞍後象娜一人銅帽花
裳執長鈎制象為疾徐之節招搖於道相見合掌為
敬敬於已者則跪拜有所論則叩頭受之雖貴為叻
孟見宣慰莫敢仰視凡有問對則膝行而前三步一
拜退亦如之賤見貴少見長皆然侍貴人之側或過
其前必躬身而趨筵宴則貴人上坐僚屬以次列坐

於下有十客則令十人齊行十客之酒酒初行樂作一人大呼一聲衆人和之如此者三既就坐先進飯次具醪饌有差食不用筋每客一卒跪坐側持木瓶盥悅凡物必祭而後食樂有三曰楚夷樂緬樂車里樂楚夷樂有箏笛胡琴饗踐之類歌中國之曲緬樂者緬人所作排簫琵琶之類作則衆皆拍手而和車里樂者車里人所作以羊皮為三五尺長鼓以手拍之間以銅鏡鼓拍板與中國僧道之樂無異鄉村宴飲則擊大鼓吹蘆笙舞牌為樂無中國文字小事則刻竹木為契如期不爽大事書緬字為檄無文案城池因高山為砦無倉廩租賦每秋冬遣親信往各甸計房屋徵金銀謂之取差發每屋一楹輸銀一兩或二三兩其法殺人與姦者皆死竊盜一家皆死為寇一村皆死道不拾遺軍民無定籍每三五人充軍一人正軍謂之昔刺猶言壯士昔刺持兵器餘負荷供餼每二十萬戰者不滿十萬師行軍在前夷長在中

餉饋在後進退不一而號令不紊倚象為聲勢每戰以繩自縛象上悍而無謀鋸桑為弩革為冑銅鐵雜革為函勝則驕情爭功負則逃竄山谷驛路無郵傳一里半里許構一小草樓五人守之千里有報聞在旦夕公廨與民居無異雖宣慰亦止竹樓數十間上覆以茅用陶瓦者輒有火災民間器皿多以陶冶孟艮等處則有漆器甚精其長用金銀碑磬琉璃等器其下亦以金銀為之凡部長出象馬兵戈及木榻器皿僕妾財寶之類皆從動輒數百人隨處宴樂小民苦之男貴女賤雖小人視其妻如奴僕耕織貿易徭役皆婦人任之非疾病雖老不得息凡妻生子貴者以水浴於家賤者浴於河三日後以子授其夫耕織自若頭目之妻百數婢亦數百少者數十庶民亦有數十妻無妬忌之嫌舊俗不重處女及笄始禁足今則此俗漸革矣官民皆髡首黥足有不髡則酋長殺之不黥足則衆嗤之曰婦人也婦人縮獨髻腦後以

白布裹之窄袖白布衫阜布桶裙貴者錦繡跣足凡子弟有職名則受父母跪拜人死用婦人祝於屍前親隣相聚少年百數人飲酒作樂歌舞達旦謂之娛屍婦人羣聚擊碓杵為戲數日而後葬葬則親者一人持火及刀前導至葬所以板數片瘞之其人素所用器皿甲冑戈盾皆壞之懸於墓側是後絕無祭掃之禮在祿豐羅次元謀者男帶黑布帽窄袖白衫婦著桶裙好棲居釜甑俱以陶瓦俗尚奢侈孟春作土主會稱貸以炫其飾又有鞦韆會男女雜坐信鬼好訟見人多所忌諱掘鼠及蝦蟆以敬賓客葬有棺少哀戚在江川路南者構竹樓臨水而居樓下畜牛馬婦人耳帶大環婚用牛祭用羊知蠶桑勤於耕織性柔畏法見人退讓在臨安者男青白袍纏頭著革屨衣有襖積婦人白袍束髮纏疊如仰螺好鬼喜浴極寒猶然山居構草樓家人狎處稍以帷帳間其臥處喪衣緋架木置屍其上弔者各散紅布緞一方召拜

馮誦夷經三日以簾裹而舁之山妻不更嫁名曰鬼妻其食糯米蜻蜒在蒙自者插雞尾笠端出則捕獵居則紡績在阿迷者為滇莊佃民習同蒲人新化納樓溪處大略皆同在十八寨者性險好殺畜蠱餌毒捕魚食鼠焚骨而葬又有髡者曰光頭焚夷蓋習車里之俗額上黥刺月牙所謂雕題也見流官盤膝坐舉手加額為敬男女先通而後娶葬不復顧或夢亡者味爽至塚上設一石祝之曰勿再返也在順寧者冠青而銳其頂耳環踏屨好衣素婚嫁用牛貧不能具者傭女家三年喪有棺斂封葬以石為人佃作性懦弱在劍川者言語侏儻所居瘴癘棺如馬槽以板為之惟農業陶冶是務懼訟信鬼在騰越者火炙肉食不求其熟或取蜂糟而食之習緬字器用瓮磁在曲靖者號白腳焚夷男婦俱短衣長裳齒齒文身戴笠跣足在鎮南者男子短衣婦桶裙跣足婚禮夷歌侑食人死令親者捉刀屍傍晝夜守之親朋以酒奠

捉刀人呼死者之名灌諸口中如是三日而葬每村置樹以為神六月廿四日集衆燃炬譚而賽神所居在山巔在姚安者濱水好浴腰繫竹籠捕魚婚用牛羊至女家以水潑女足為定擇葉為尖頂帽擅土布羊毛之利在元江者能為鬼魅以一蒂繫衣後即變形為象馬豬羊猫犬立通衢或直衝行人稍畏避之即為所魅入腰中食其五臟易之以土昔有客言曾臥病醫巫勿效禱於大士夢一女子於其脇下出二小兒漸成老人女子叱之乃去病遂已知者遇其所變物以一手捉之一手挺拳痛捶之必復為人奪其蒂而縻之即哀求以家貲之半丐脫食中多置毒藥中之必不治估客娶夷女者欲出必問還期或一二年或三四年女即以毒餌之如期至更以藥解救亦無他若不爾必毒發而死所許還期即死日也與外人交易爽約失信及私窺其妻女者必毒之信實樸厚者累出入亦無傷其地高原曠野土產檳榔種蒔

如中國農桑葩時
殺犬灑血汙之

獬黑 順寧有之亦蒲楚之異派其俗與楚人不甚相
遠蜂蛇鼠蛤無所不噉然勤於耕作婦人任力

男子出獵多

居山箐間

撲喇 一名撲腊婚喪與裸裎同而語言不通蓬頭跣
足衣不浣濯臥以牛皮覆用羊革氍毹衫在寧州

者強悍專務剽掠在石屏州者良善畏法為編民在
王弄山者一名馬喇首插雞羽男子服紅經白緯衣
婦女衣白墾山
種木棉為業

普特 以漁為業性耐寒舟不盈丈而收爨牲畜資生
之具咸備又有涸水捕魚者丹鬚蓬髮竟沒水

中與波俱起口嚙手捉皆巨魚
今滇池旁碧雞山下有此種類

窩泥

或曰幹泥男環耳跣足婦衣花布衫以紅白錦繩辮髮數絡海貝雜珠盤旋為螺髻穿青黃珠

垂胸為絡裳無襜褕紅黑紗縷間雜飾其左右既適人則以藤束膝下為識娶婦數年無子則出之喪無棺弔者擊鐃鼓搖鈴頭插雞尾跳舞名曰洗鬼忽泣忽飲三日採松為架焚而葬其骨祭用牛羊揮扇環歌拊掌踏足以鉦鼓蘆笙為樂食無筋以手搏飯勤生畜用集貝一百二十索為一窖死則囑其子我生平藏貝若干矣汝取某處窖餘留為來生用臨安郡屬縣及左能寨思陀溪處落恐諸長官司景東曲靖皆有之在南安州又曰和泥男子剪髮齊眉衣不掩脛飲酒以一人吹蘆笙為首男女連手周旋跳舞為樂死以雌雄雞各一殉葬阿迷州稱阿泥鄧川州稱俄泥

糯比

元江有之即阿泥之別種風俗與阿泥同

黑鋪

元江有之其俗與阿泥同而言語微異性巧慧善作宮室編竹為器一切牀几棹凳備極精巧

漢人莫能及男多黧黑女微白上下相接皆有禮畜養山羊不食羊肉夷中之最善者

母雞

蓬頭椎髻標以雞羽形貌醜惡婦女尤甚挽髻如角向前衣文繡短不過腹項垂纓絡飾其臂

遷徙無常居多竹屋耕山食蒞暇則射獵捕食猿狙佩利刀負強弩毒矢伺隙剽竊性狠惡父子兄弟怒則相殺多居寧州及王弄山

麼些

即唐書所稱麼些蠻今麗江之夷總稱麼些而永北祿豐亦皆有其類俗不類澤自古已然男

子以繩纏頭耳帶綠珠婦人布冠好畜牛羊勇厲善騎射挾短刀少不如意鳴鉦鼓相讐殺婦女投場和解乃罷俗儉約飲食疏薄歲暮競殺牛羊相邀請一客不至則為深恥正月五日登山祭天人死以竹簣

昇至山下無
貴賤皆焚之

力些

迤西皆有之在大理名栗栗在姚安名獾獾有生熟二種男囚首跣足衣麻布衣披氍衫以氍

為帶束其腰婦女裹白麻布善用弩發無虛矢每令其婦負小木盾徑三四寸者前行自後發弩中其盾而婦無傷以此制服西番

土人

在武定府境男衣絮襖腰束皮索飢則繫縛之繫刀弩婦披羊皮氍毹嫺嫺親以牛羊刀甲為聘

新婦披髮見姑舅性剛劣不能華言有爭者告天煮沸湯投物以手捉之屈則糜爛直者無恙耕田弋山

寅午戌日
入城交易

土獠

其屬本在蜀黔西粵之交流入滇亦處處有之而石屏峨嵋嶺路南較多男子首裹青悅服白麻

衣領上綴紅布一方婦人冠紅巾衣花繡性悍戾在
岷峨者樵蘇自給在路南者為人佃種屋廬與焚人
同在新興者居西山之麓服食婚
喪習同白獐以孟冬朔日為歲首

怒人男子髮用繩束高七八寸婦人結布於髮其俗
大抵剛狠好殺餘與麼些同麗江有之其在鶴
慶府維西邊外過怒江十餘日有野夷名怒子自古
不通中國於本朝雍正八年相率到維西將虎皮
二十張山驢皮十張麻布三十方
黃蠟八十觔充貢願永為年例

扯蘇一名車蘇在楚雄臨安諸處居於山巔無陶瓦
木片覆屋耕山種菽麥皮履布衣器以木擺錫
為飾新平
亦有之

山蘇

在臨安諸處潛居深山板片為屋種菽稗為食
能制竹器入市易米出常持弩射禽炙食種麻

為衣男子披髮跣足婦人挽髻蒙頭諸夷惟此種最苦

儂人其種在廣南習俗大畧與楚夷同其長為儂智高裔部夷因號為儂樓居無椅凳席地而坐脫履梯下而後登甘犬嗜鼠婦人衣短衣長裙男子首裹青花幌衣籠布如絺長技在銃蓋得之交趾者刀盾鎗甲寢處不離日事戰鬪王弄山教化三部亦有之蓋廣南之流也

沙人習俗多同儂人慄勁過之在廣西者屬於隴氏在富州者屬於李氏沈氏維摩水下地連濶諸夷互爭以強力相兼併又有青龍六詔者獍獍尤甚地產老杉生懸崖千丈間伐之多無全材堅逾蜀產羅平州亦有沙人器用木婚喪以牛為禮

蒲人即古百濮周書與微盧彭俱稱西人春秋傳與巴楚鄧並為南土本在永昌西南徼外謠濮為

蒲有因以名其地者若蒲縹蒲甘之類是也男裹青紅布於頭繫青綠小縑繩多為貴賤者則無衣花套長衣膝下繫黑藤婦人挽髻腦後頭戴青綠珠以花布圍腰為裙上繫海貝十數圍繫莎羅布於肩上永昌鳳溪施甸及十五喧二十八寨皆其種勤耕種徒跣登山疾逾飛鳥今漸弱而貧其流入新興祿豐阿迷鎮南者椎髻跣足套頭短衣手帶銅鐲耳環銅圈帶刀弩長牌飾以絲漆上插孔雀尾婦女簪用骨短裳綠絲婚令女擇配葬用莎羅布裹屍而焚之不知荷擔以篋負背上或傍水居不畏深淵能浮以渡在蒙自及開化十八寨皆號野蒲桀驁勝諸夷在景東者淳樸務農在順寧沿蘭滄江居者號普蠻亦曰樸子蠻性尤悍惡專為盜賊不鞍而騎徒跣短甲不蔽脛膝馳突迅疾善鎗弩男子以布二幅縫合掛身無襟袂領緣婦人織紅黑布搭於右肩結於左脇以蔽其胷另以布一幅蔽腰見人不知拜跪寢無衾榻拳

曲而臥

古宗

一作牯猓西番之別種滇之西北與吐番接壤流入境內麗江鶴慶皆間有之男子辮髮百縷

披垂前後經年不櫛浴櫛必以牲祭披長氍裳以犛牛尾或羊毛織之婦人以青白磁珠與碑礮相雜懸於首其食生肉蔓菁薤稗

西番

永北一帶凡在金沙江者皆是辮髮雜以瑪瑙銅珠為綴三年一櫛之衣雜布革腰束文花氍毹

帶披琵琶氍毹富者至三四領暑熱不去住山腰以板覆屋俗尚勇力善射有緬字經以葉書之祀神逐鬼取而誦焉性暴悍隨畜遷徙又有野西番者倏去倏來尤不可制

峨昌

一名阿昌性畏暑濕好居高山刀耕火種婦女以紅藤為腰飾祭以犬占用竹三十三根略

如著嗜酒負擔瓦禽獸豕皆生噉之採野葛為衣
無部長雜處山谷聽土司役屬今永昌羅右羅板羅
明三寨皆其種舊俗父兄死則妻其母嫂後羅板寨
百夫長早正死其妻方艾自矢不失節遂餓而死其
俗乃

革

縹人

婦女以白布裹頭短衫露其腹以紅藤
纏之莎羅布為裙上短下長男女同耕

哈喇

男女色深黑不知鹽櫛男子花布套衣婦人紅
黑藤纏腰數十圍產子竹兜盛之負於背又有

古喇男女色黑尤甚種類略同哈杜亦
類哈喇居山言語不通略似人形耳

緬人

有數種曰老緬曰得楞子曰阿瓦如猛別雍會
普潞洞吾擺古皆其類大抵各以其地得名性

貪利好鬪食不用匙筯長於鳥銃其火藥必得麥麩
傳之迅疾無聲其法祕不傳人俗好佛男女俱以布

盤其首色黑類哈喇擺古最遠而疆

結些

以象牙為大環從耳尖穿至頰以紅花布一丈許裹頭而垂帶於後衣半身衫袒其右肩

遮些

縮髮為髻男女皆貫耳佩環性喜華彩衣盤旋蔽體飲食精潔戰鬪長於弓矢恃象銃稍與緬

同孟養一帶多其種類

羯些子

種出迤西孟養流入騰越環眼烏喙耳帶大環無衣遮腹下以布一幅米肉不煮而食勇

健執鎗刀敢戰喊聲如吠犬

地羊鬼

短髮黃睛性奸狡嗜利出沒不常與人相讐能行妖術用器物易其肝膽心腎為木石遂

不救又置盞飲食中如元江所為

喇魯

性悍居崖穴衣麻布捕山禽野獸為食賦役俱無

苗子

有九種黔省最多在滇則宣威鎮雄亦有之多是花苗居水濱不畏酷暑多田羅陳蔡四姓形

狀類黑乾夷蒙布為冠飾以綵絨短衣無襟腰連細褶短裙至膝跣足節序擊銅鼓吹吶叭懽聚賽神書契數目字跡並六十甲子皆如漢制餘不同親迎婿步行迎婦歸始置酒待客母家三日後以牲畜送婿家以為粧奩婿家答以牛馬布疋即準財禮厚款送歸死則氈裹舁而焚諸野婚配各以其類不通諸夷

黑乾夷

宣威有之男椎髻頭纏麻布耳帶大銅圈垂至肩穿麻布短衣跣足女衣套頭衣毛褐細帶編如篩盤罩於首飾以海貝磳磳等物衣領亦然裙裙亦用毛褐居深山密箐婚配不用媒妁男吹笙女彈口琴唱和相調悅而野合歸語父母始用媒聘迎婦歸死則裹以氈舁而焚諸野此夷中之最賤者

狔人

平彝有之習俗儉約男女皆事犂鋤短衣長裙構樓而居甘犬嗜鼠病不服藥惟務祭鬼習俗

大約與沙人同

苦葱

臨安元江普洱皆有之性儉居山崖種菠稗度日男女混雜不知禮義衣服多同糯比

喇烏

臨安景東有之男如獮夷衣用棉布女裝如窩泥短衣桶裙山居亦務種植男善伏水取魚

麥岔

和曲有之娶婦以牝牛為聘吹笙飲酒擔柴荷簣治生勤苦

羅緬

祿勸有之耕種山田肩挑背負採薪揀菌貿易鹽米

卡情

元江有之性頑鈍喜歌舞男女多苟合遇婚娶通媒妁之日議聘金多者或至百金娶後子孫

猶有代祖父償聘金者故娶妻之家見婦生女喜不自勝若生數子即以為大累葬皆火化

黑濮

所居多在威遠普洱江界之間其人多黑色男女皆徒跣不勤洗滌語言稍似西番耕山力穡

頗知紡織多作竹器入市交易男子剃髮為辮短衣着褲善操弩矢女子單衣僅長尺前不扣合以彩布為桶裙其裙蒙乳以至下體又用五色燒珠與海貝排串為飾束於臍下兩耳穿孔環以銀銅錫婚聘惟以牛銀喪服白布葬即除之其喪皆用木槽

曼且

南中諸志紀皆所不載姚安有之尚丑為正月性好飲而蕩男婦作懽鳴葉吹薪彈箴弄枯則

皆音節流暢合夷曲而雜和之其聲喑然咿然亦可聽飲竟月而忘返不知節用過此則終歲飢寒惟尋野菜充腹而已性亦疑畏

夏喇

永昌騰越內外境俱有之耕種類阿狷形狀似獐獐克悍善鬪婦女斜纏錦布於腰居山巔戶

不正出迎屋山開門
遷徙無常不留餘粟

卡瓦

夷中之頑梗者也永順東南辣蒜江外有之貌醜性惡亦耕種有寨落紅藤束髮纏腰披麻布

持利刃梭標於要路竊伏劫掠行商必結伴多人兼有保護者乃敢過今守禦戒嚴此風漸止商賈凡出騰越入木邦貿易木棉者必經其地呼為卡利瓦有生熟二種生者劫掠熟者保路

小列密

雲州有之刀耕火種精於射獵遇雀鼠則以弩取而炮食之

利米

順寧有之男子好衣阜面黃黑善弩獵每射雀得之即為生啖女子分辦赤足出外常披花布

以蔽其身

狻人

麗江界內有之披樹葉為衣茹毛飲血無屋宇居山巖中

大獾黑

雲州有之黑陋愚蠢所食收稗即為上品其餘樹皮野菜藤蔓及蛇蟲蜂蟻蟬鼠禽鳥遇

之生噉不葺廬舍崖居野處與野人同類也

小獾黑

習尚與大獾黑同但形狀差小

野人

居無屋廬夜宿於樹巔赤髮黃睛以樹皮毛布為衣掩其臍下首帶骨圈插雞毛纏紅藤執勾

刀大刀抹捕禽獸茹毛飲血食蛇鼠性至兇悍登高涉險如飛逢人即殺在茶山李麻之外去騰越千餘里無約束二長官為所戕賊避之鎮淮關內舊志稱尋甸巖谷野蠻以木皮蔽其身形貌醜惡男少女多持木弓以禦侵

闕

雲南通志卷二十四